

大般涅槃經

(三十六卷：第二十二卷至第二十四卷)

北涼天竺三藏曇無讖譯 梵

宋沙門慧嚴慧觀同謝靈運再治



南無本師釋迦牟尼佛

說明

本繁體校正版《大般涅槃經》(南本)電子書，是根據《乾隆大藏經》大乘涅槃部，第0110部，北涼天竺三藏曇無讖譯梵、宋沙門慧嚴慧觀同謝靈運再治《大般涅槃經》(36卷)影印本校正的。標點符號僅供參考。

為了便於讀誦，本電子書按順序每三卷合為一冊，共十二冊。若每天讀一冊，可十二天讀完。

本電子書是免費結緣品。特此說明。

仁慧草堂

二〇一八年十月

目錄

起誦儀	- 1 -
香讚	- 1 -
開經偈	- 1 -
大般涅槃經卷第二十二	- 2 -
高貴德王菩薩品第二十二之四	- 2 -
大般涅槃經卷第二十三	- 29 -
高貴德王菩薩品第二十二之五	- 29 -
大般涅槃經卷第二十四	- 62 -
高貴德王菩薩品第二十二之六	- 62 -
結誦儀	- 82 -
補闕真言	- 82 -
發願文	- 82 -
迴向偈	- 83 -
迴向偈	- 83 -
三皈依	- 84 -

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

大般涅槃經卷第二十二

北涼天竺三藏曇無讖譯 梵

宋沙門慧嚴慧觀同謝靈運再治

高貴德王菩薩品第二十二之四¹

「復次，善男子，云何菩薩摩訶薩修大涅槃成就具足第二功德？

「善男子，菩薩摩訶薩修大涅槃，昔所不得而今得之，昔所不見而今見之，昔所不聞而今聞之，昔所不至²而今得至，昔所不知而今知之。

「云何名為昔所不得而今得之？所謂神通，昔所不得而今乃得。通有二種：一者，內；二者，外。所言外者，與外道共。內復有二：一者，二乘；二者，菩薩。菩薩修行大涅槃經所得神通，不與聲聞、辟支佛共。云何名為不與聲聞、辟支佛共？二乘所作神通變化，一心作一，不得眾多；菩薩不爾，於一心中則能具足現五趣身。所以者何？以得如是大涅槃經威神³力故。是則名為昔所不得而今得之。

¹ 大正藏：光明遍照高貴德王菩薩品之四

² 大正藏：到（後同）

³ 大正藏：之勢；永樂北藏及龍藏：威神

「又復云何昔所不得而今得之？所謂身得自在、心得自在。何以故？一切凡夫所有身心不得自在，或心隨身，或身隨心。云何名為心隨於身？譬如醉人，酒在身中，爾時身動，心亦隨動；亦如身懶，心亦隨懶，是則名為心隨於身。又如嬰兒，其身稚小，心亦隨小；大人身大，心亦隨大。又如有人身體羸澁，心常思念欲得膏油潤漬令軟。是則名為心隨於身。云何名為身隨於心？所謂去、來、坐、卧修行施、戒、忍辱、精進，愁惱之人身則羸悴，歡喜之人身則肥悅⁴，恐怖之人身體戰動，專心聽法身則怡懌⁵，悲苦⁶之人涕淚橫流，是則名為身隨於心。菩薩不爾，於身、心中俱得自在，是則名為昔所不得而今得之。

「復次，善男子，菩薩摩訶薩所現身相猶如微塵，以此微身悉能遍至無量無邊恒河沙等諸佛世界無所障闔⁷，而心常定，初不移動，是則名為心不隨身，是亦名為昔所不至而今能至。

「何故復名昔所不至而今能至？一切聲聞、辟支佛等所不能至，菩薩能至，是故名為昔所不至而今能至。一切聲聞、辟支佛等雖以神通，不

⁴ 大正藏：鮮

⁵ 大正藏：悅

⁶ 大正藏：泣

⁷ 大正藏：礙

能變身如細微塵，遍至無量恒河沙等諸佛世界。聲聞、緣覺身若動時，心亦隨動；菩薩不爾，心雖不動，身無不至，是名菩薩心不隨身。

「復次，善男子，菩薩化身猶如三千大千世界，以此大身入一塵身，其心爾時亦不隨小。聲聞、緣覺雖能化身令如三千大千世界，而不能以如此大身入微塵身，於此事中尚自不能，況能令心而不隨動？是名菩薩心不隨身。

「復次，善男子，菩薩摩訶薩以一音聲，能令三千大千世界眾生悉聞，心終不念：『令是音聲遍諸世界，使諸眾生昔所不聞而今得聞。』而是菩薩亦初不言：『我令眾生昔所不聞而今得聞。』菩薩若言『因我說法令諸眾生不聞聞』者⁸，當知是人終不能得阿耨多羅三藐三菩提。何以故？眾生不聞我為說者，如此之心是生死心，一切菩薩是心已盡，以是義故，菩薩摩訶薩所有身心不相隨逐。

「善男子，一切凡夫身心相隨，菩薩不爾，為化眾生故，雖現身小，心亦不小。何以故？諸菩薩等所有心性常廣大故。雖現大身，心亦不大。云何大身？身如三千大千世界。云何小心？行嬰

⁸ 大正藏：菩薩若言：『因我說法令諸眾生不聞者聞。』

兒行。以是義故，心不隨身。

「菩薩⁹已於無量阿僧祇劫，遠酒不飲而心亦動，心無悲苦身亦流淚，實無恐怖身亦戰慄。以是義故，當知菩薩身、心自在，不相隨逐。菩薩摩訶薩惟¹⁰現一身，而諸眾生各各見異。

「善男子¹¹，云何菩薩摩訶薩修大涅槃，昔所不聞而今得聞？菩薩摩訶薩先取聲相，所謂象聲、馬聲、車聲、人聲、貝、鼓、簫、笛、歌、哭等聲，而修習之；以修習故，能聞無量三千大千世界所有地獄音聲；復轉修習得異耳根，異於聲聞、緣覺天耳。何以故？二乘所得清淨耳通¹²，若依初禪淨妙四大，唯聞初禪，不聞二禪，乃至四禪亦復如是。雖能¹³一時聞于¹⁴三千大千世界所有音聲，而不能聞無量無邊恒河沙等世界音聲。以是義故，菩薩所得異於聲聞、緣覺耳根。以是異故，昔所不聞而今得聞。雖聞音聲而心初無聞聲之相，不作有相、常相、樂相、我相、淨相、主相、依相、作相、因相、定相、果相。以是義故，諸菩薩等昔所不聞而今得聞。」

⁹ 大正藏：菩薩摩訶薩；永樂北藏及龍藏：菩薩

¹⁰ 大正藏：唯

¹¹ 大正藏：復次，善男子；永樂北藏及龍藏：善男子

¹² 大正藏：根

¹³ 大正藏：可

¹⁴ 大正藏：得聞；永樂北藏及龍藏：聞于

爾時，光明遍照高貴德王菩薩¹⁵言：「如¹⁶佛所說：『不作定相，不作果相。』是義不然。何以故？如來上¹⁷說：『若人聞是大涅槃經一句、一字，必定得成阿耨多羅三藐三菩提。』如來於今¹⁸復言無定無果。若得阿耨多羅三藐三菩提，即是定相，即是果相，云何而言無定無果？聞惡聲故，則生惡心；生惡心故，則至三塗；若至三塗，則是定果，云何而言無定無果？」

爾時，如來讚言：「善哉！善哉！善男子，能作是問。若使諸佛說諸音聲有定、果相者，則非諸佛世尊之相，是魔王相、生死之相、遠涅槃相。何以故？一切諸佛凡所演說無定、果相。善男子，譬如刀中照人面像，豎則見長，橫則見廣，若有定相，云何而得豎則見長、橫則見廣？以是義故，諸佛世尊凡所演說無定、果相。

「善男子，夫涅槃者，實非聲果。若使涅槃是聲果者，當知涅槃非是常法。善男子，譬如世間從因生法，有因則有果，無因則無果。因無常故，果亦無常。所以者何？因亦作果，果亦作因。以是義故，一切諸法無有定相。若使涅槃從因生

¹⁵ 大正藏：菩薩摩訶薩；永樂北藏及龍藏：菩薩

¹⁶ 大正藏：若

¹⁷ 大正藏：先

¹⁸ 大正藏：於今云何；永樂北藏及龍藏：於今

者，因無常故，果亦無常。而是涅槃不從因生，體非是果，是故為常。善男子，以是義故，涅槃之體無定無果。

「善男子，夫涅槃者，亦可言定，亦可言果。云何為定？一切諸佛所有涅槃常、樂、我、淨，是故為定。無生、老、壞，是故為定。一闍提等犯四重禁、誹謗方等、作五逆罪，捨除本心必定得故，是故為定。

「善男子，如汝所言，若人聞我說大涅槃一字、一句得阿耨多羅三藐三菩提者，汝於是義猶未解了。汝今¹⁹諦聽，吾當為汝更分別說²⁰。善男子，若有善男子、善女人聞大涅槃一字、一句，不作字相，不作句相，不作聞相，不作佛相，不作說相，如是義者名無相相，以無相相故得阿耨多羅三藐三菩提。

「善男子，如汝所言，聞惡聲故至三塗者，是義不然。何以故？非以惡聲而至三塗，當知是果乃是惡心。所以者何？有善男子、善女人等雖聞惡聲，心不生惡，是故當知非因惡聲生三趣中。而諸眾生因煩惱結，惡心滋多生三惡趣，非因惡

¹⁹ 大正藏：當

²⁰ 大正藏：之

聲。若聲有定相，諸有聞者，一切悉應生於惡心。或有生者、有不生者，是故當知聲無定相。以無定相²¹故，雖復因之，不生惡心。」

「世尊！聲若無定，云何菩薩昔所不聞而今得聞？」

「善男子，聲無定相，昔所不聞，令諸菩薩而今得聞。以是義故，我作是說：『昔所不聞而今得聞。』」

「善男子，云何昔所不見而今得見？菩薩摩訶薩²²修大涅槃微妙經典，先取明相，所謂日、月、星宿、庭²³燎、燈燭、珠火之明、藥草等光，以修習故，得異眼根，異於聲聞、緣覺所得。云何為異？二乘所得清淨天眼，若依欲界四大眼根不見初禪；若依初禪，不見上地，乃至白眼猶不能見；若欲多見，極至三千大千世界。菩薩摩訶薩不修天眼，見妙色身悉是骨相，雖見他方恒河沙等世界色相，不作色相，不作常相、有相、物相、名字等相，作因緣相，不作見相，不言是眼微妙淨相，唯見因緣、非因緣相。云何因緣？色是眼緣。若使是色非因緣者，一切凡夫不應生於

²¹ 大正藏：定；永樂北藏及龍藏：定相

²² 大正藏：善男子，菩薩摩訶薩；永樂北藏及龍藏：菩薩摩訶薩

²³ 大正藏：庭

見色之相。以是義故，色名因緣。非因緣者，菩薩摩訶薩雖復見色，不生²⁴色相，是故非緣。以是義故，菩薩所得清淨天眼異於聲聞、緣覺所得。以是異故，一時遍見十方世界現在諸佛，是名菩薩眼²⁵所不見而今得見。以是異故，能見微塵聲聞、緣覺所不能見。以是異故，雖見白眼，初無見相，見無常相，見凡夫身三十六物不淨充滿，如於掌中觀阿摩勒果。以是義故，昔所不見而今得見。

「若見眾生所有色相，則知其人大小乘根。一觸衣故，亦知是人善惡諸根差別之相。以是義故，昔所不知而今得知。以一見故，昔所不知而今得知。以此知故，昔所不見而今得見。

「善男子²⁶，云何菩薩昔所不知而今得知？菩薩摩訶薩雖知凡夫貪、恚、癡心，初不作心及心數相，不作眾生及以物相，修第一義畢竟空相。何以故？一切菩薩常善修習空性相故。以修空故，昔所不知而今得知。云何為知？知無有我，無有所，知諸眾生皆有佛性。以佛性故，一闡提等捨離本心，悉當得成阿耨多羅三藐三菩提。如此

²⁴ 大正藏：作

²⁵ 大正藏：昔

²⁶ 大正藏：復次，善男子；永樂北藏及龍藏：善男子

皆是聲聞、緣覺所不能知，菩薩能知。以是義故，昔所不知而今得知。

「復次，善男子，云何昔所不知而今得知？菩薩摩訶薩修大涅槃微妙經典，念過去世一切眾生所生種姓、父母、兄弟、妻子、眷屬、知識、怨憎，於一念中得殊異智，異於聲聞、緣覺智慧。云何為異？聲聞、緣覺所有智慧，念過去世所有眾生種姓、父母乃至怨憎，而作種姓至怨憎相。菩薩不爾，雖念過去種姓、父母乃至怨憎，終不生於種姓、父母、怨憎等相，常作法相、空寂之相。是名菩薩昔所不知而今得知。

「復次，善男子，云何昔所不知而今得知？菩薩摩訶薩修大涅槃微妙經典得他心智，異於聲聞、緣覺所得。云何為異？聲聞、緣覺以一念智知人心時，則不能知地獄、畜生、餓鬼、天心。菩薩不爾，於一念中遍知六趣眾生之心。是名菩薩昔所不知而今得知。

「復次，善男子，復有異知，菩薩摩訶薩於一心中知須陀洹初心，次第至十六心，以是義故，昔所不知而今得知。是為菩薩修大涅槃具足成就第二功德。

「復次，善男子，云何菩薩摩訶薩修大涅槃

成就具足第三功德？善男子，菩薩摩訶薩修大涅槃捨慈得慈，得慈之時不從因緣。云何名為捨慈得慈？善男子，慈，名世諦。菩薩摩訶薩捨世諦故²⁷得第一義慈，不從緣得²⁸。

「復次，云何捨慈得慈？慈若可捨，名凡夫慈；慈若可得，即名菩薩無緣之慈。捨一闡提慈、犯重禁慈、謗方等慈、作五逆慈，得憐憫慈，得如來慈、世尊之慈、無因緣慈。

「云何復名捨慈得慈？捨黃門慈、無根、二根、女人之慈、屠膾、獵師、畜養雞猪如是等慈，亦捨聲聞、辟支佛慈，得諸菩薩無緣之慈。不見己慈，不見他慈；不見持戒，不見破戒。雖自見悲，不見眾生；雖有苦受，不見受者。何以故？以修第一真實義故。是名菩薩修大涅槃成就具足第三功德。

「復次，善男子，云何菩薩摩訶薩修大涅槃成就具足第四功德？善男子，菩薩摩訶薩修大涅槃成就具足第四功德，有十事²⁹。何等為十？一者，根深難可傾拔；二者，自身生決定想；三者，不觀福田及非福田；四者，修淨佛土；五者，滅

²⁷ 大正藏：慈

²⁸ 大正藏：第一義慈不從緣得；永樂北藏及龍藏：不從緣得

²⁹ 大正藏：十種事；永樂北藏及龍藏：十事

除有餘；六者，斷除業緣；七者，修清淨身；八者，了知諸緣；九者，離諸怨敵；十者，斷除二邊。

「云何根深難可傾拔？所言根者，名不放逸。不放逸者，為是何根？所謂阿耨多羅三藐三菩提根。善男子，一切諸佛諸善根本皆不放逸，不放逸故，諸餘善根展轉增長；以能增長諸善根故，於諸善中最为殊勝。善男子，如諸跡中，象跡為上；不放逸法亦復如是，於諸善法最为殊勝。善男子，如諸明中，日光為最；不放逸法亦復如是，於諸善法最为殊勝。善男子，如諸王中，轉輪聖王為最第一；不放逸法亦復如是，於諸善法為最第一。善男子，如諸流中，四河為最；不放逸法亦復如是，於諸善法為上為最。善男子，如諸山中，須彌山王為最第一；不放逸法亦復如是，於諸善法為最第一。善男子，如水生華中，青蓮為最；不放逸法亦復如是，於諸善法為最為上。善男子，如陸生華中，婆利師華為最為上；不放逸法亦復如是，於諸善法為最為上。善男子，如諸獸中，師子為最；不放逸法亦復如是，於諸善法為最為上。善男子，如飛鳥中，金翅鳥王為最為上；不放逸法亦復如是，於諸善法為最為上。善

男子，如大身中，羅睺阿修羅王為最為上；不放逸法亦復如是，於諸善法為最為上。善男子，如一切眾生，若二足、四足、多足、無足中，如來為最；不放逸法亦復如是，於善法中為最為上。善男子，如諸眾中，佛僧為上；不放逸法亦復如是，於善法中為最為上。善男子，如佛法中，大涅槃法為最為上；不放逸法亦復如是，於諸善法為最為上。善男子，以是義故，不放逸根深固難拔。云何不放逸故而得增長？所謂信根、戒根、施根、慧根、忍根、聞根、進根、念根、定根、善知識根，如是諸根，不放逸故而得增長。以增長故，深固難拔。以是義故，名為菩薩摩訶薩修大涅槃根深難拔。

「云何於身作決定想？於自身所生決定心：『我今此身，於未來世定當為阿耨多羅三藐三菩提器。心亦如是，不作狹小，不作變易，不作聲聞、辟支佛心，不作魔心及自樂心、樂生死心，常為眾生求慈悲心。』是名菩薩於自身中生決定心：『我於來世當為阿耨多羅三藐三菩提器。』以是義故，菩薩摩訶薩修大涅槃於自身中生決定想。

「云何菩薩不觀福田及非福田？云何福田？外道持戒上至諸佛，是名福田。若有念言：『如

是等輩是真福田。』當知是心則為狹劣。菩薩摩訶薩悉觀一切無量眾生無非福田。何以故？以善修習異念處故。有異念處善修習者，觀諸眾生無有持戒及以毀戒，常觀諸佛世尊所說：『施雖四種，俱得淨報。』何等為四？一者，施主清淨，受者不淨；二者，施主不淨，受者清淨；三者，施、受俱淨；四者，二俱不淨。云何施淨、受者不淨？施主具有戒、聞、智慧，知有惠施及以果報；受者破戒，專著邪見，無施無報。是名施淨受者不淨。云何名為受者清淨，施主不淨？施主破戒，專著邪見，言無惠施及以果報；受者持戒、多聞、智慧，知有惠施及施果報。是名施主不淨，受者清淨。云何名為施受俱淨？施者、受者俱有持戒、多聞、智慧，知有惠施及施果報，是名施受二俱清淨。云何名為二俱不淨？施者、受者破戒、邪見，言無有施及施果報。若如是者，云何復言得淨果報？以無施無報故，名為淨。

「善男子，若有不見施及施報，當知是人破戒、專著邪見。若依聲聞，言不見施及施果報，是則名為破戒、邪見。若依如是大涅槃經，不見惠施及施果報，是則名為持戒、正見。菩薩摩訶薩有異念處，以修習故，不見眾生持戒、破

戒、施者、受者及施果報，是故得名持戒、正見。以是義故，菩薩摩訶薩不觀福田及非福田。

「云何名為淨佛國土？菩薩摩訶薩修大涅槃微妙經典，為阿耨多羅三藐三菩提度眾生故，離殺害心。以此善根願與一切眾生共之，願諸眾生得壽命長，有大勢力，獲大神通。以是誓願因緣力故，於未來世成佛之時，國土所有一切眾生得壽命長，有大勢力，獲大神通。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，離偷盜心。以此善根願與一切眾生共之，願諸佛國土地所有純是七寶，眾生富足，所欲自恣。以此誓願因緣力故，於未來世成佛之時所得國土純是七寶，眾生富足，所欲自恣。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，離淫³⁰欲心。以此善根願與一切眾生共之，願諸佛土所有眾生無有貪欲、瞋恚、癡心，亦無飢渴苦惱之患。以是誓願因緣力故，於未來世成佛之時，國土眾生遠離貪淫、瞋恚、癡心，一切無有飢渴苦惱。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，離妄語心。以此

³⁰ 大正藏：婬

善根願與一切眾生共之，願諸佛土常有華果、茂林³¹、香樹，所有眾生得妙音聲。以是誓願因緣力故，於未來世成佛之時，所有國土常有華果、茂林³²、香樹，其中眾生悉得清淨上妙音聲。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，遠離兩舌。以此善根願與一切眾生共之，願諸佛土所有眾生常共和合，講說正法。以是誓願因緣力故，成佛之時，國土所有一切眾生悉共和合，講論法要。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，遠離惡口。以此善根願與一切眾生共之，願諸佛土地平如掌，無有沙石³³、荊棘³⁴、惡刺，所有眾生其心平等。以是誓願因緣力故，於未來世成佛之時，所有³⁵國土地平如掌，無有石沙、荊棘、惡刺，所有眾生其心平等。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，離無義語。以此善根願與一切眾生共之，願諸佛土所有眾生無有苦惱。以是誓願因緣力故，於未來世成

³¹ 大正藏：茂林、華果；永樂北藏及龍藏：華果、茂林

³² 大正藏：茂林、華果；永樂北藏及龍藏：華果、茂林

³³ 大正藏：石沙；永樂北藏及龍藏：沙石

³⁴ 大正藏：棘

³⁵ 大正藏：得

佛之時，國土所有一切眾生無有苦惱。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，遠離貪嫉。以此善根願與一切眾生共之，願諸佛土一切眾生無有貪嫉、惱害、邪見。以是³⁶誓願因緣力故，於未來世成佛之時，國土所有一切眾生悉無貪嫉、惱害、邪見。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，遠離惱害。以此善根願與一切眾生共之，願諸佛土所有眾生悉共修習大慈大悲，得一子地。以是誓願因緣力故，於未來世成佛之時，世界所有一切眾生悉共修習大慈大悲，得一子地。復次，善男子，菩薩摩訶薩修大涅槃微妙經典，為阿耨多羅三藐三菩提度眾生故，遠離邪見。以此善根願與一切眾生共之，願諸國³⁷土所有眾生悉得摩訶般若波羅蜜。以是誓願因緣力故，於未來世成佛之時，世界眾生悉得受持摩訶般若波羅蜜。是名菩薩修淨佛土。

「云何菩薩摩訶薩滅除有餘？有餘有三：一者，煩惱餘報；二者，餘業；三者，餘有。善男子，云何名為煩惱餘報？若有眾生習近貪欲，是

³⁶ 大正藏：此

³⁷ 大正藏：佛

報熟故，墮於地獄；從地獄出，受畜生身，所謂鴿、雀、鴛鴦、鸚鵡、耆婆耆婆、舍利伽鳥、青雀、魚、鼈、獼猴、麀鹿；若得人身，受黃門形、女人、二根、無根、淫女；若得出家，犯初重戒。是名餘報。復次，善男子，若有眾生以殷重心習近瞋恚，是報熟故，墮於地獄。從地獄出，受畜生身，所謂毒蛇，具四種毒：見毒、觸毒、齧毒、噓毒，師子、虎、狼、熊羆、猫、狸、鷹、鷂之屬；若得人身，具足十六諸惡律儀；若得出家，犯第二重戒。是名餘報。復次，善男子，若有修習愚癡之人，是報熟時，墮於地獄。從地獄出，受畜生身，所謂象、猪、牛、羊、水牛、蚤、虱、蟲、虻、蟻子等形；若得人身，聾、盲、瘖啞、癱殘、背偻³⁸，諸根不具，不能受法；若得出家，諸根闇鈍，喜犯重戒，乃至五錢³⁹。是名餘報。復次，善男子，若有修習憍慢之人，是報熟時，墮於地獄。從地獄出，受畜生身，所謂糞蟲、駝、驢、犬、馬；若生人中，受奴婢身，貧窮乞匄；或得出家，常為眾生之所輕賤，破第四戒。是名餘報。如是等名煩惱餘報。如是餘報，菩薩摩訶

³⁸ 大正藏：僂

³⁹ 大正藏：卑賤：永樂北藏及龍藏：五錢

薩以能修習大涅槃故，悉得除滅。

「云何餘業？謂一切凡夫業、一切聲聞業、須陀洹人受七有業、斯陀含人受二有業、阿那含人受色有業，是名餘業。如是餘業，菩薩摩訶薩以能修習大涅槃故，悉得除斷⁴⁰。

「云何餘有？阿羅漢得阿羅漢果、辟支佛得辟支佛果，無業無結而轉二果，是名餘有。

「如是三種有餘之法，菩薩摩訶薩修習大乘大涅槃經故得除滅⁴¹，是名菩薩摩訶薩滅除有餘。

「云何菩薩修清淨身？菩薩摩訶薩修不殺戒有五種心，謂下、中、上、上上、上中上⁴²，乃至正見亦復如是。是五十心名初發心，具足決定成五十心，是名滿足。如是百心名百福德，具足百福成於一相，如是展轉具足成就三十二相，名清淨身。所以復修八十種好，世有眾生事八十種神⁴³。何等八十？十二日、十二大天、五大星、北斗、馬天、行道天、婆羅墮跋闍天、功德天、二十八宿、地天、風天、水天、火天、梵天、樓陀天、因提天、拘摩羅天、八臂天、摩醯首羅天、半闍羅天、鬼子母天、四天王天、造書天、婆藪

⁴⁰ 大正藏：斷除；永樂北藏及龍藏：除斷

⁴¹ 大正藏：滅除；永樂北藏及龍藏：除滅

⁴² 大正藏：上中、上上；永樂北藏及龍藏：上上、上中上

⁴³ 大正藏：八十神；永樂北藏及龍藏：八十種神

天，是名八十。為此眾生修八十好以自莊嚴，是名菩薩清淨之身。何以故？是八十天，一切眾生之所信伏，是故菩薩修八十好其身不動，令彼眾生隨其所信各各得見，見已宗敬，各發阿耨多羅三藐三菩提心。以是義故，菩薩摩訶薩修於淨身。善男子，譬如有人欲請大王，要當莊嚴所有舍宅，極令清淨，辦具種種百味餽饈，然後王乃就其所請。菩薩摩訶薩亦復如是，欲請阿耨多羅三藐三菩提法輪王故，先當修身，極令清淨，無上法王乃當處之。以是義故，菩薩摩訶薩要當修於清淨之身。善男子，譬如有人欲服甘露，先當淨身；菩薩摩訶薩亦復如是，欲服無上甘露法味般若波羅蜜，要當先以八十種好清淨其身。善男子，譬如妙好金銀寶器，盛於⁴⁴淨水，中表俱淨；菩薩摩訶薩其身清淨亦復如是，盛阿耨多羅三藐三菩提水，中表俱淨。善男子，如波羅捺素白之衣易受染色。何以故？性白淨故。菩薩摩訶薩亦復如是，以身淨故，疾得阿耨多羅三藐三菩提。以是義故，菩薩摩訶薩修於淨身。

「云何菩薩⁴⁵了知諸緣？菩薩摩訶薩不見色

⁴⁴ 大正藏：之

⁴⁵ 大正藏：菩薩摩訶薩；永樂北藏及龍藏：菩薩

相，不見色緣，不見色體，不見色生，不見色滅，不見一相，不見異相，不見見者，不見相貌，不見受者。何以故？了因緣故。如色，一切法亦如是，是名菩薩了知諸緣。

「云何菩薩離⁴⁶諸怨敵？一切煩惱是菩薩怨，菩薩摩訶薩常遠離故，是名菩薩壞諸怨敵。五住菩薩視諸煩惱不名為怨。所以者何？因煩惱故，菩薩有生；以有生故，故能展轉教化眾生。以是義故，不名為怨。何等為怨？所謂誹謗方等經者。菩薩隨生，不畏地獄、畜生、餓鬼，唯畏如是謗方等者。一切菩薩有八種魔名為怨家，遠是八魔名離怨家。是名菩薩離諸怨敵。

「云何菩薩遠離二邊？言二邊者，謂二十五有及愛煩惱。菩薩常離二十五有及愛煩惱，是名菩薩遠離二邊。

「是名菩薩摩訶薩修大涅槃具足成就第四功德。」

爾時，光明遍照高貴德王菩薩摩訶薩言：「如佛所說：『若有菩薩修大涅槃，悉作如是十事功德。』如來何故唯修九事，不修淨土？」

佛言：「善男子，我於往昔亦常具修如是十

⁴⁶ 大正藏：壞

事，一切菩薩及諸如來無有不修是十事者。若使世界不淨充滿，諸佛世尊於中出者，無有是處。善男子，汝今莫謂諸佛出與不淨世界，當知是心不善狹劣。汝今當知，我實不出閻浮提界。譬如有人說言：『此界獨有日月，他方世界無有日月。』如是之言無有義理。若有菩薩發如是言：『此佛世界穢惡不淨，他方佛土清淨莊嚴。』亦復如是。

「善男子，西方去此娑婆世界度三十二恒河沙等諸佛國土，彼有世界名曰無勝。彼土何故名曰無勝？其土所有莊嚴之事悉皆⁴⁷平等，無有差別，猶如西方安樂世界，亦如東方滿月世界。我於彼土出現於世。為化眾生故，於此界閻浮提中現轉法輪。非但我身獨於此中現轉法輪，一切諸佛亦於此中而轉法輪。以是義故，諸佛世尊非不修行如是十事。

「善男子，慈氏菩薩以誓願故，當來之世令此世界清淨莊嚴。以是義故，一切諸佛所有世界無不嚴淨。

「復次，善男子，云何菩薩⁴⁸修大涅槃微妙經典具足成就第五功德？善男子，菩薩摩訶薩修

⁴⁷ 大正藏：皆悉；永樂北藏及龍藏：悉皆

⁴⁸ 大正藏：菩薩摩訶薩；永樂北藏及龍藏：菩薩

大涅槃具足成就第五功德，有五事⁴⁹。何等為五？一者，諸根完具；二者，不生邊地；三者，諸天愛念；四者，常為天、魔、沙門、刹利、婆羅門等之所恭敬；五者，得宿命智。菩薩以是大涅槃經因緣力故，具足如是五事功德。」

光明遍照高貴德王菩薩言：「如佛所說：『若有善男子、善女人修於布施則得具成五事功德。』今云何言因大涅槃得是五事？」

佛言：「善哉！善哉！善男子，如是之事其義各異，今當為汝分別解說。

「施得五事：不定、不常、不淨、不勝、不異，非無漏，不能利益、安樂、憐憫一切眾生。若依如是大涅槃經所得五事，是定、是常、是淨、是勝、是異，是無漏，則能利益、安樂、憐憫一切眾生。善男子，夫布施者，得離飢渴；大涅槃經能令眾生悉得遠離二十五有渴愛之病。布施因緣令生死相續；大涅槃經能令生死斷不相續。因布施故，受凡夫法；因大涅槃得作菩薩。布施因緣能斷一切貧窮苦惱；大涅槃經能斷一切貧善法者。布施因緣有分有果；因大涅槃得阿耨多羅三

⁴⁹ 大正藏：五事果；永樂北藏及龍藏：五事

藐三菩提無分無果。是名菩薩⁵⁰修大涅槃微妙經典具足成就第五功德。

「復次，善男子⁵¹，云何菩薩修大涅槃微妙經典具足成就第六功德？菩薩摩訶薩修大涅槃得金剛三昧，安住是中，悉能破散一切諸法，見一切法皆是無常，皆是動相，恐怖因緣，病苦劫盜，念念滅壞，無有真實，一切皆是魔之境界，無可見相。菩薩摩訶薩住是三昧，雖施眾生，乃至不見一眾生；實為眾生故，精勤修習尸波羅蜜，乃至修習般若波羅蜜亦復如是。菩薩若見有一眾生，不能畢竟具足成就檀波羅蜜乃至具足般若波羅蜜。

「善男子，譬如金剛，所擬之處無不碎壞，而是金剛無有折損。金剛三昧亦復如是，所擬之法無不碎壞，而是三昧無有折損。善男子，如諸寶中，金剛最勝。菩薩所得金剛三昧亦復如是，於諸三昧為最第一。何以故？菩薩摩訶薩修是三昧，一切三昧悉來歸屬。善男子，如諸小王悉來歸屬轉輪聖王。一切三昧亦復如是，悉來歸屬金剛三昧。善男子，譬如有人為國怨讎，人所厭患，

⁵⁰ 大正藏：菩薩摩訶薩；永樂北藏及龍藏：菩薩

⁵¹ 大正藏：善男子；永樂北藏及龍藏：復次，善男子

有人殺之，一切世人無不稱讚是人功德。金剛三昧亦復如是，菩薩修習能壞一切眾生怨敵，是故常為一切三昧之所宗敬。善男子，譬如有人，其力盛壯，人無當者，復更有人力能伏之，當知是人世所稱美。金剛三昧亦復如是，力能摧伏難伏之法，以是義故，一切三昧悉來歸屬。善男子，譬如有人在大海浴，當知是人已用諸河泉池之水。菩薩摩訶薩亦復如是，修習如是金剛三昧，當知已為修習諸餘一切三昧。善男子，如香山中有一泉水名阿耨達，其泉具足八味之水，有人飲之無諸病苦。金剛三昧亦復如是，具八正道，菩薩修習，斷諸煩惱瘡疣重病。善男子，如人供養摩醯首羅，當知是人已為供養一切諸天。金剛三昧亦復如是，有人修習，當知已為修習一切諸餘三昧。

「善男子，若有菩薩安住如是金剛三昧，見一切法無有障閼⁵²，如於掌中觀阿摩勒果。菩薩雖復得如是見，終不作想：『見一切法。』」

「善男子，譬如有人坐四衢道，見諸眾生來、去、坐、卧。金剛三昧亦復如是，見一切法生、滅、出、沒。善男子，譬如高山，有人登之，遠望諸方皆悉明了。金剛定山亦復如是，菩薩登之，

⁵² 大正藏：礙

遠望諸法無不明了。善男子，譬如春月，天降甘雨，其滂微緻，間無空處，淨⁵³眼之人見之明了。菩薩亦爾，得金剛定清淨之日，遠見東方所有世界，其中或有國土成壞，一切皆見，明了無障，乃至十方亦復如是。善男子，如由乾陀山七日並出，其山所有樹木叢林一切燒盡。菩薩修習金剛三昧亦復如是，所有一切煩惱叢林即時消滅。善男子，譬如金剛，雖能摧破一切有物，終不生念：『我能摧破。』金剛三昧亦復如是，菩薩修已，能破煩惱，終不生念：『我能壞結。』善男子，譬如大地能持萬物，終不生念：『我力能持。』火亦不念：『我能燒物。』水亦不念：『我能潤漬。』風亦不念：『我能動物。』空亦不念：『我能容受。』涅槃亦復不生念言：『我令眾生而得滅度。』金剛三昧亦復如是，雖能滅除一切煩惱，而初無心言：『我能滅。』

「若有菩薩安住如是金剛三昧，於一念中變身如佛，其數無量，遍滿十方恒河沙等諸佛世界。如⁵⁴是菩薩雖作是化，其心初無憍慢之想。何以故？菩薩常念：『誰有是定，能作是化？唯有菩

⁵³ 大正藏：明

⁵⁴ 大正藏：而

薩安住如是金剛三昧乃能作耳。』菩薩摩訶薩安住如是金剛三昧，於一念中遍至十方恒河沙等諸佛世界，還其本處，雖有是力，亦不念言：『我能如是。』何以故？以是三昧因緣力故。菩薩摩訶薩安住如是金剛三昧，於一念中能斷十方恒河沙等世界眾生所有煩惱，而心初無斷諸眾生煩惱之想。何以故？以是三昧因緣力故。菩薩住是金剛三昧，以一音聲有所演說，一切眾生各隨種類而得解了；示現一色，一切眾生各各皆見種種色相；安住一處，身不移易，能令眾生隨其方面各各而見；演說一法，若界若入，一切眾生各隨本解而得聞之。菩薩安住如是三昧，雖見眾生而心初無眾生之相，雖見男女無男女相，雖見色法無有色相乃至見識亦無識相，雖見晝夜無晝夜相，雖見一切無一切相，雖見一切煩惱諸結亦無一切煩惱之相，見入⁵⁵聖道無聖道相，雖見菩提無菩提相，見於涅槃無涅槃相。何以故？善男子，一切諸法本無相故。菩薩以是三昧力故，見一切法如本無相。

「何故名為金剛三昧？善男子，譬如金剛，若在日中，色則不定。金剛三昧亦復如是，在於

⁵⁵ 大正藏：八；永樂北藏及龍藏：八

大眾色亦不定，是故名為金剛三昧。善男子，譬如金剛，一切世人不能平⁵⁶價。金剛三昧亦復如是，所有功德一切人天不能平⁵⁷量，是故復名金剛三昧。善男子，譬如貧人，得金剛寶即⁵⁸得遠離貧窮、困苦、惡鬼、邪毒。菩薩摩訶薩亦復如是，得是三昧則能遠離煩惱、諸苦、諸魔、邪毒，是故復名金剛三昧。是名菩薩修大涅槃具足成就第六功德。

大般涅槃經卷第二十二

⁵⁶ 大正藏：評

⁵⁷ 大正藏：評

⁵⁸ 大正藏：則

大般涅槃經卷第二十三

北涼天竺三藏曇無讖譯 梵

宋沙門慧嚴慧觀同謝靈運再治

高貴德王菩薩品第二十二之五⁵⁹

「復次，善男子，云何菩薩摩訶薩修大涅槃微妙經典具足成就第七功德？」

「善男子，菩薩摩訶薩修大涅槃微妙經典作是思惟：『何法能為大般涅槃而作近因？』菩薩即知有四種法為大涅槃而作近因。若言勤修一切苦行是大般⁶⁰涅槃近因緣者，是義不然。所以者何？若離四法得涅槃者，無有是處。

「何等為四？一者，親近善友；二者，專心聽法；三者，繫念思惟；四者，如法修行。

「善男子，譬如有人，身遇眾病，若熱若冷，虛勞下瘡，眾邪鬼毒，至⁶¹良醫所，良醫即為隨病說藥。是人至心善受醫教，隨教合藥，如法服之，服已病愈，身得安樂。有病之人，譬諸菩薩；大良醫者，譬善知識；良醫所說，譬方等經；善

⁵⁹ 大正藏：光明遍照高貴德王菩薩品之五

⁶⁰ 大正藏：大；永樂北藏及龍藏：大般

⁶¹ 大正藏：到

受醫教，譬善思惟方等經義；隨教合藥，譬如法修行三十七助道之法；病除愈者，譬滅煩惱；得安樂者，譬⁶²得涅槃常、樂、我、淨。

「善男子，譬如有王，欲如法治，令民安樂，咨諸智臣，其法云何？諸臣即以先王舊法而為說之，王既聞已，至心信行，如法治國，無諸怨敵，是故令民安樂無患。善男子，王者，譬諸菩薩；諸智臣者，譬善知識；智臣為王所說治法，譬十二部經；王既聞已，至心信行，譬諸菩薩繫心思惟十二部經所有深義；如法治國，譬諸菩薩如法修行，所謂六波羅蜜；以能修習六波羅蜜故，無諸怨敵，譬諸菩薩已離諸結煩惱惡賊；得安樂者，譬諸菩薩得大涅槃常、樂、我、淨。

「善男子，譬如有人，遇惡癩病，有善知識而語之言：『汝若能至⁶³須彌山邊，病可得差。所以者何？彼有良藥，味如甘露，若能服者，病無不差⁶⁴。』其人至心信是事已，即往彼山采⁶⁵服甘露，其病除愈，身得安樂。惡癩病者，譬諸凡夫；善知識者，譬諸菩薩摩訶薩等；至心信受，譬四無量心；須彌山者，譬八聖道；甘露味者，譬於

⁶² 大正藏：喻

⁶³ 大正藏：到

⁶⁴ 大正藏：愈

⁶⁵ 大正藏：採

佛性；癩病除愈，譬滅煩惱；得安樂者，譬得涅槃常、樂、我、淨。

「善男子，譬如有人，畜諸弟子，聰明大智，是人晝夜常教不倦。諸菩薩等亦復如是，一切眾生，有信不信，而常教化，無有疲厭。

「善男子，善知識者，所謂佛、菩薩，辟支佛、聲聞人中信方等者。何故名為善知識耶？善知識者，能教眾生遠離十惡，修行十善。以是義故，名善知識。

「復次，善知識者，如法而說，如說而行。云何名為如法而說，如說而行？自不殺生，教人不殺，乃至自行正見，教人正見。若能如是，則得名為真善知識。自修菩提，亦能教人修行菩提。以是義故，名善知識。自能修行信、戒、布施、多聞、智慧，亦能教人信、戒、布施、多聞、智慧。復以是義，名善知識。

「善知識者，有善法故。何等善法？所作之事不求自樂，常為眾生而求安樂；見他有過不訟⁶⁶其短，口常宣說淳⁶⁷善之事。以是義故，名善知識。

⁶⁶ 大正藏：說

⁶⁷ 大正藏：純

「善男子，如空中月，從初一日至十五日漸漸增長。善知識者亦復如是，令諸學人漸遠惡法，增長善法。

「善男子，若有親近善知識者，本未有戒、定、慧、解脫、解脫知見，即便有之；未具足者，則得增廣。何以故？以其親近善知識故。因是親近，復得了達十二部經甚深之義。若能聽是十二部經甚深義者，名為聽法；聽法者則是大乘方等經典；聽方等經名真聽法；真聽法者即是聽受大涅槃經。大涅槃中聞有佛性，如來畢竟不般涅槃，是故名為專心聽法；專心聽法名八聖道，以八聖道能斷貪欲、瞋恚、愚癡，故名聽法。夫聽法者名十一空，以此諸空於一切法不作相貌。夫聽法者，名初發心乃至究竟阿耨多羅三藐三菩提心，以因初心得大涅槃，不以聞故得大涅槃，以修習故得大涅槃。

「善男子，譬如病人，雖聞醫教及藥名字不能愈病，要以服故乃得除差。雖聽十二深因緣法不能斷滅一切煩惱，要以繫念善思惟故能得除斷，是名第三繫念思惟。

「復以何義名繫念思惟？所謂三三昧：空三昧、無相三昧、無作三昧。空者，於二十五有不

見一實；無作者，於二十五有不作願求；無相者，無有十相，所謂色相、聲相、香相、味相、觸相、生相、住相、滅相、男相、女相。修習如是三三昧者，是名菩薩繫念思惟。

「云何名為如法修行？如法修行即是修行檀波羅蜜乃至般若波羅蜜，知陰、入、界真實之相，亦知聲聞、緣覺、諸佛同於一道而般涅槃。法者，即是常、樂、我、淨，不生不老，不病不死，不飢不渴，不苦不惱，不退不沒。善男子，解大涅槃甚深義者，則知諸佛終不畢竟入於涅槃。

「善男子，第一真實善知識者，所謂菩薩、諸佛世尊。何以故？常以三種善調御故。何等為三？一者，畢竟軟語；二者，畢竟呵責；三者，軟語呵責。以是義故，菩薩、諸佛即是真實善知識也。

「復次，善男子，佛及菩薩為大醫故名善知識，何以故？知病知藥，應病授藥故。譬如良醫，善八種術，先觀病相，相有三種，何等為三？謂風、熱、水。風病之人⁶⁸，授之酥油；熱病之人授之石蜜；水病之人授之薑湯。以知病根，授藥得差，故名良醫。佛及菩薩亦復如是，知諸凡夫

⁶⁸ 大正藏：有風病者；永樂北藏及龍藏：風病之人

病有三種：一者，貪欲；二者，瞋恚；三者，愚癡。貪欲病者，教觀骨相；瞋恚病者，觀慈悲相；愚癡病者，觀十二因緣⁶⁹相。以是義故，諸佛、菩薩名善知識。

「善男子，譬如船師，善度⁷⁰人故，名大船師。諸佛、菩薩亦復如是，度諸眾生生死大海，以是義故，名善知識。

「復次，善男子，因佛、菩薩令諸眾生具足修得善法根本⁷¹故。善男子，譬如雪山乃是種種微妙上藥根本之處。佛及菩薩亦復如是，悉是一切善根本處。以是義故，名善知識。善男子，雪山之中有上香藥，名曰娑訶⁷²，有人見之，得壽無量，無有病苦，雖有四毒不能中傷。若有觸者，增長壽命滿百二十。若有念者，得宿命智。何以故？藥勢力故。諸佛、菩薩亦復如是，若有見者，即得斷除一切煩惱，雖有四魔不能干亂。若有觸者，命不可夭，不生不死，不退不沒。所謂觸者，若在佛邊聽受妙法。若有念者，得阿耨多羅三藐三菩提。以是義故，諸佛、菩薩名善知識。

「善男子，如香山中有阿耨達池，由是池故

⁶⁹ 大正藏：十二緣；永樂北藏及龍藏：十二因緣

⁷⁰ 大正藏：渡

⁷¹ 大正藏：根；永樂北藏及龍藏：根本

⁷² 大正藏：呵

有四大河，所謂恒河、辛頭、私陀、博叉。世間眾生常作是言：『若有罪者，浴此四河，眾罪得滅。』當知此言虛妄不實。除此已往，何等為實？諸佛、菩薩是乃為實。所以者何？若人親近，則得滅除一切眾罪。以是義故，名善知識。

「復次，善男子，譬如大地，所有藥木、一切叢林、百穀、甘蔗、華果之屬，值天炎旱，將欲枯死，難陀龍王及婆難陀憐憫眾生，從大海出，降注⁷³甘雨，一切叢林、百穀、草木滋潤還生。一切眾生亦復如是，所有善根將欲消滅，諸佛、菩薩生大慈悲，從智慧海降甘露雨，令諸眾生具足還得十善之法。以是義故，諸佛、菩薩名善知識。

「善男子，譬如良醫，善八種術，見諸病人，不觀種姓、端正、醜陋、錢財、寶貨，悉為治之，是故世稱為大良醫。諸佛、菩薩亦復如是，見諸眾生有煩惱病，不觀種姓、端正、醜陋、錢財、寶貨，生慈憫心，悉為說法。眾生聞已，煩惱病除。以是義故，諸佛、菩薩名善知識。以是親近善友因緣，則得近於大般涅槃。

「云何菩薩聽法因緣而得近於大般涅槃？

⁷³ 大正藏：澍

一切眾生以聽法故則具信根，得信根故，樂行布施、戒、忍、精進、禪定、智慧，得須陀洹果乃至佛果。是故當知，得諸善法皆是聽法因緣勢力。

「善男子，譬如長者，惟⁷⁴有一子，遣至他國市易所須，示其道路通塞之處，而復戒⁷⁵之：『若遇淫⁷⁶女，慎莫親愛。若親愛者，喪身殞命及以財寶。弊惡之人亦莫交游⁷⁷。』其子敬順父之教勅，身心安隱，多獲寶貨。菩薩摩訶薩為諸眾生敷演法要亦復如是，示諸眾生及四部眾諸道通塞。是諸眾等以聞法故，遠離諸惡，具足諸⁷⁸法。以是義故，聽法因緣則得近於大般涅槃。

「善男子，譬如明鏡，照人面像無不明了。聽法明鏡亦復如是，有人照之，則見善惡，明了無翳。以是義故，聽法因緣則得近於大般涅槃。

「善男子，譬如商人，欲至寶渚，不知道路，有人示之，其人隨語即至寶渚，多獲諸珍不可稱計。一切眾生亦復如是，欲至善處，采求法寶⁷⁹，不知其路通塞之相，菩薩示之，眾生隨已，得至善處獲得無上大涅槃寶。以是義故，聽法因緣則

⁷⁴ 大正藏：唯

⁷⁵ 大正藏：誡

⁷⁶ 大正藏：姪

⁷⁷ 大正藏：遊

⁷⁸ 大正藏：善

⁷⁹ 大正藏：採取道寶；永樂北藏及龍藏：采求法寶

得近於大般涅槃。

「善男子，譬如醉象，狂逸暴惡，多欲殺害。有調象師，以大鐵鉤鉤擗⁸⁰其頂，即時調順，惡心都盡。一切眾生亦復如是，貪欲、瞋恚、愚癡醉故，欲多造惡。諸菩薩等以聞法鉤，擗⁸¹之令住，更不得起造諸惡心。以是義故，聽法因緣則得近於大般涅槃。

「是故，我於處處經中說我弟子專心聽受十二部經，則離五蓋，修七覺分，以是修習七覺分故，則得近於大般涅槃。以聽法故，須陀洹人離諸恐怖。所以者何？須達長者身遭重病，心大愁怖，聞舍利弗說須陀洹有四功德、十種慰喻，聞是事已，恐怖即除。以是義故，聽法因緣則得近於大般涅槃。何以故？開法眼故。世有三人：一者，無目；二者，一目；三者，二目。無目之人⁸²，常不聞法；一目之人，雖暫聞法，其心不住；二目之人專心聽受，如聞而行。以聽法故，得知世間如是三人。以是義故，聽法因緣則得近於大般涅槃。

「善男子，如我昔在⁸³拘尸那城。時，舍利

⁸⁰ 大正藏：斲

⁸¹ 大正藏：斲

⁸² 大正藏：言無目者；永樂北藏及龍藏：無目之人

⁸³ 大正藏：於

弗身遇病苦，我時顧命阿難⁸⁴廣為說法。時，舍利弗聞是事已，告四弟子：『汝昇⁸⁵我床往至佛所，我欲聽法。』時，四弟子奉命昇往，即⁸⁶得聞法，聞法力故，所苦除差，身得安隱。以是義故，聽法因緣則得近於大般涅槃。

「云何菩薩思惟因緣而得近於大般涅槃？因是思惟，心得解脫。何以故？一切眾生常為五欲之所繫縛，以思惟故，悉得解脫。以是義故，思惟因緣則得近於大般涅槃。」

「復次，善男子，一切眾生常為常、樂、我、淨四法之所顛倒。以思惟故，得見諸法無常、無樂、無我、無淨。如是見已，四倒即斷。以是義故，思惟因緣則得近於大般涅槃。」

「復次，善男子，一切諸法有四種相，何等為四？一者，生相；二者，老相；三者，病相；四者，滅相。以是四相，能令一切凡夫眾生至須陀洹生大苦惱。若能繫念善思惟者，雖遇此四，不生眾苦。以是義故，思惟因緣則得近於大般涅槃。」

「復次，善男子，一切善法無不因是思惟而

⁸⁴ 大正藏：阿難比丘；永樂北藏及龍藏：阿難

⁸⁵ 大正藏：舉

⁸⁶ 大正藏：既

得。何以故？有人雖於無量無邊阿僧祇劫專心聽法，若不思惟，終不能得阿耨多羅三藐三菩提。以是義故，思惟因緣則得近於大般涅槃。

「復次，善男子，若有眾生信佛、法、僧無有變易而生恭敬，當知皆是繫念思惟因緣力故，因得斷除一切煩惱。以是義故，思惟因緣則得近於大般涅槃。

「云何菩薩如法修行？善男子，斷諸惡法，修習善法，是名菩薩如法修行。

「復次，云何如法修行？見一切法空無所有，無常、無樂、無我、無淨。以是見故，寧捨身命不犯禁戒，是名菩薩如法修行。

「復次，云何如法修行？修有二種：一者，真實；二者，不實。不實者，不知涅槃、佛性、如來、法、僧、實相、虛空等相，是名不實。云何真實？能知涅槃、佛性、如來、法、僧、實相、虛空等相，是名真實。云何名為知涅槃相？涅槃之相凡有八事。何等為八？一者，盡；二，善性；三，實；四，真；五，常；六，樂；七，我；八，淨，是名涅槃。復有八事。何等為八？一者，解脫；二者，善性；三者，不實；四者，不真；五者，無常；六者，無樂；七者，無我；八者，無

淨。復有六相：一者，解脫；二者，善性；三者，不實；四者，不真；五者，安樂；六者，清淨。若有眾生依世俗道斷煩惱者，如是涅槃則有八事解脫不實。何以故？不常故⁸⁷。以無常故，則無有實；無有實故，則無有真。雖斷煩惱，以還起故，無常、無我、無樂、無淨，是名涅槃解脫八事。

「云何六相？聲聞、緣覺斷煩惱故，名為解脫；而未能得阿耨多羅三藐三菩提故，名不實⁸⁸；以不實故，名為不真；未來之世當得阿耨多羅三藐三菩提故，名無常；以得無漏八聖道故，名為淨樂。

「善男子，若如是知，是知涅槃，不名佛性、如來、法、僧、實相、虛空。

「云何菩薩知於佛性？佛性有六。何等為六？一、常，二、淨，三、實，四、善，五、當見，六、真。復有七事：一者，可證，餘六如上。是名菩薩知於佛性。

「云何菩薩知如來相？如來即是覺相、善相，常、樂、我、淨、解脫、真實，示道可見，是名

⁸⁷ 大正藏：以不常故；永樂北藏及龍藏：不常故

⁸⁸ 大正藏：名為不實；永樂北藏及龍藏：名不實

菩薩知如來相。

「云何菩薩知於法相？法者，若善、不善，若常、不常，若樂、不樂，若我、無我，若淨、不淨，若知、不知，若解、不解，若真、不真，若修、不修，若師、非師，若實、不實，是名菩薩知於法相。

「云何菩薩知於僧相？僧者，常⁸⁹、樂、我、淨，是弟子相、可見之相，善、真、不實。何以故？一切聲聞得佛道故。何故名真？悟法性故。是名菩薩知於僧相。

「云何菩薩知於實相？實相者，若常、無常，若樂、無樂，若我、無我，若淨、無淨，若善、不善，若有、若無，若涅槃、非涅槃，若解脫、非解脫，若知、不知，若斷、不斷，若證、不證，若修、不修，若見、不見，是名實相，非是涅槃、佛性、如來、法、僧、虛空。

「是名菩薩因修如是大涅槃，故知於涅槃、佛性、如來、法、僧實相、虛空等法差別之相。

「善男子，菩薩摩訶薩修大涅槃微妙經典不見虛空。何以故？佛及菩薩雖有五眼所不見故，唯有慧眼乃能見之。慧眼所見無法可見，故名為

⁸⁹ 大正藏：若常；永樂北藏及龍藏：常

見。若是⁹⁰無物名虛空者，如是虛空乃名為實。以是實故，則名常無；以常無故，無樂、我、淨。善男子，空名無法，無法名空。譬如世間，無物名空；虛空之性亦復如是，無所有故，名為虛空。

「善男子，眾生之性與虛空性俱無實性。何以故？如人說言：『除滅有物，然後作空。』而是虛空實不可作。何以故？無所有故。以無有故，當知無空。是虛空性若可作者，則名無常；若無常者，不名虛空。

「善男子，如世間人說言：『虛空無色、無閔⁹¹，常不變易。』是故，世稱虛空之性⁹²為第五大。善男子，而是虛空實無有性。以光明故，故名虛空，實無虛空。猶如世諦實無其性，為眾生故，說有世諦。

「善男子，涅槃之體亦復如是，無有住處，直是諸佛斷煩惱處，故名涅槃。涅槃即是常、樂、我、淨。涅槃雖樂，非是受樂，乃是上妙寂滅之樂。諸佛如來有二種樂：一，寂滅樂；二，覺知樂。實相之體有三種樂：一者，受樂；二、寂滅樂；三、覺知樂。佛性一樂，以當見故，得阿耨

⁹⁰ 大正藏：見

⁹¹ 大正藏：礙

⁹² 大正藏：法

多羅三藐三菩提時名菩提樂。」

爾時，高貴德王⁹³菩薩摩訶薩白佛言：「世尊！若煩惱斷處是涅槃者，是事不然。何以故？如來往昔初成佛道，至尼連禪河邊。爾時，魔王與其眷屬到於佛所而作是言：『世尊！涅槃時至⁹⁴，何故不入？』佛告魔王：『我今未有多聞弟子，善持禁戒，聰明利智，能化眾生，是故不入。』若言煩惱斷處是涅槃者，諸菩薩等於無量劫已斷煩惱，何故不得稱為涅槃？俱是斷處，何緣獨稱諸佛有之，菩薩無耶？若斷煩惱非涅槃者，何故如來昔告生名婆羅門言：『我今此身即是涅槃。』如來又時在毗舍離國，魔復啟請如來：『昔以未有弟子，多聞持戒，聰明利智，能化眾生，不入涅槃。今已具足，何故不入？』如來爾時即告魔言：『汝今莫生悞遲之想，却後三月吾當涅槃。』世尊！若使滅度非涅槃者，何故如來自期三月當般涅槃？世尊！若斷煩惱是涅槃者，如來往昔初在道場菩提樹下斷煩惱時便是涅槃。何故復言：『却後三月當般涅槃。』世尊！若使爾時涅槃⁹⁵者，云何方為拘尸那城諸力士等說言：『後夜當般涅槃。』

⁹³ 大正藏：光明遍照高貴德王；永樂北藏及龍藏：高貴德王

⁹⁴ 大正藏：到

⁹⁵ 大正藏：是涅槃；永樂北藏及龍藏：涅槃

如來誠實，云何發是虛妄之言？」

爾時，世尊告光明遍照高貴德王菩薩摩訶薩言：「善男子，若言如來得廣長舌，當知如來於無量劫已離妄語，一切諸佛及諸菩薩凡所發言誠諦無虛。善男子，如汝所言，波旬往昔啟請於我入涅槃者，善男子，而是魔王真實不知涅槃定相。何以故？波旬意謂不化眾生、默然而住便是涅槃。善男子，譬如世人，見人不言，無所造作，便謂是人如死無異。魔王波旬亦復如是，意謂如來不化眾生，默無所說，便謂如來入般涅槃。

「善男子，如來不說佛、法、眾僧無差別相，唯說常住、清淨二法無差別耳。善男子，佛亦不說佛及佛性、涅槃無差別相，惟⁹⁶說常、恆不變無差別耳。善男子，佛亦不說涅槃、實相無差別相，惟⁹⁷說常有、實不變易無差別耳。

「善男子，爾時，我諸聲聞弟子生於諍訟，如拘睒彌諸惡比丘違反我教，多犯禁戒，受不淨物，貪求利養，向諸白衣而自讚歎：『我得無漏，謂須陀洹果。』乃至『我得阿羅漢果。』毀辱他人，於佛、法、僧、戒律、和尚⁹⁸不生恭敬。公於我

⁹⁶ 大正藏：唯

⁹⁷ 大正藏：唯

⁹⁸ 大正藏：上

前言：『如是物，佛所聽畜；如是等物，佛不聽畜。』我即⁹⁹語言：『如是等物，我實不聽。』復反我言：『如是等物，實是佛聽。』如是惡人不信我言，為是等故，我告波旬：『汝莫悞遲，却後三月當般涅槃。』

「善男子，因如是等惡比丘故，令諸聲聞受學弟子不見我身，不聞我法，便言如來入於涅槃；唯諸菩薩能見我身、常聞我法，是故不言我入涅槃。聲聞弟子雖復發言如來涅槃，而我實不入於涅槃。

「善男子，若我所有聲聞弟子說言如來入涅槃者，當知是人非我弟子，是魔伴黨、邪見惡人，非正見也。若言如來不入涅槃，當知是人真我弟子、非魔伴黨、正見之人，非惡邪也。

「善男子，我初不見弟子之中有言如來不化眾生，默然而住，名般涅槃也。善男子，譬如長者，多有子息，捨至他方，未得還頃，諸子咸謂父已長逝，而是長者實不終沒，諸子顛倒皆生沒想。聲聞弟子亦復如是，不見我故，便謂如來已於拘尸城¹⁰⁰娑羅雙樹間而般涅槃，而我實不般涅

⁹⁹ 大正藏：亦

¹⁰⁰ 大正藏：拘尸那城；永樂北藏及龍藏：拘尸城

槃也，聲聞弟子生涅槃想。

「善男子，譬如明燈，有人覆之，餘不知者謂燈已滅，而是明焰實亦不滅。以不知故，生於滅想。聲聞弟子亦復如是，雖有慧眼，以煩惱覆令心顛倒，不見真身而便妄生滅度之想，而我實不畢竟滅度。

「善男子，如生盲人不見日月，以不見故，不知晝夜明闇之相；以不知故，便說無有日月之實。實有日月，盲者不見；以不見故，而生倒想，言無日月。聲聞弟子亦復如是，如彼生盲，不見如來便謂如來入於涅槃。如來實不入於涅槃，以倒想故生如是心。

「善男子，譬如雲霧覆蔽日月，癡人便言無有日月。日月實有，直以覆故，眾生不見。聲聞弟子亦復如是，以諸煩惱覆智慧眼，不見如來，便言如來入於滅度。善男子，直是如來現嬰兒行，非滅度也。

「善男子，如闇浮提，日入之時眾生不見，以黑山障故，而是日性實無沒入。眾生不見，生沒入想。聲聞弟子亦復如是，為諸煩惱山所障故，不見我身。以不見故，便於如來生滅度想，而我實不畢竟永滅。是故，我於毗舍離國告波旬言：

『却後三月我當涅槃。』

「善男子，如來懸¹⁰¹見迦葉菩薩却後三月善根當熟；亦見香山須跋陀羅竟安居已，當至我所。是故，我告魔王波旬：『却後三月當般涅槃。』

「善男子，有諸力士，其數五百，終竟三月亦當得發阿耨多羅三藐三菩提心。我為是故，告波旬言：『却後三月當般涅槃。』

「善男子，如純陀等及五百離¹⁰²車菴羅果女，却後三月，無上道心善根成熟。為是等故，我告波旬：『却後三月當般涅槃。』

「善男子，須那剎多親近外道尼捷¹⁰³子等，我為說法滿十二年。彼人邪見，不信不受。我知是人邪見根栽却後三月定可拔斷，我為是故告波旬言：『却後三月當般涅槃。』

「善男子，何因緣故，我於往昔尼連河邊告魔王波旬：『我今未有多聞¹⁰⁴弟子，是故不得入於涅槃¹⁰⁵。』？我時欲為五比丘等於波羅捺轉法輪故，次復欲為五比丘等，所謂耶奢、富那、毗摩羅闍、憍梵波提、須婆睺，次復欲為郁伽長者等

¹⁰¹ 大正藏：玄

¹⁰² 大正藏：梨

¹⁰³ 大正藏：乾

¹⁰⁴ 大正藏：智

¹⁰⁵ 大正藏：入於涅槃。』者；永樂北藏及龍藏：入於涅槃

五十人，次復欲為摩伽陀國頻婆娑羅王等無量人天，次復欲為優樓頻螺迦葉門徒五百比丘，次復欲為那提迦葉、伽耶迦葉兄弟二人及五百弟子，次復欲為舍利弗、目犍連¹⁰⁶等二百五十比丘轉妙法輪。是故，我告魔王波旬不般涅槃。

「善男子，有名涅槃非大涅槃。云何涅槃非大涅槃？不見佛性而斷煩惱，是名涅槃，非大涅槃。以不見佛性故，無常、無我，唯有樂、淨，以是義故，雖斷煩惱，不得名為大般涅槃¹⁰⁷。若見佛性能斷煩惱，是則名為大般涅槃。以見佛性故，得名為常、樂、我、淨。以是義故，斷除煩惱亦得稱為大般涅槃。

「善男子，涅槃者言不，槃者言織¹⁰⁸，不織¹⁰⁹之義名為涅槃。又槃言覆¹¹⁰，不覆之義乃名涅槃。槃言去、來，不去、不來乃名涅槃。槃者言取，不取之義乃名涅槃。槃言不定，定無不定乃名涅槃。槃言新故，無新故義乃名涅槃。槃言障礙，無障礙義乃名涅槃。

「善男子，有優樓迦、迦毗羅弟子等言：『槃

¹⁰⁶ 大正藏：大目犍連；永樂北藏及龍藏：目犍連

¹⁰⁷ 大正藏：大般涅槃也；永樂北藏及龍藏：大般涅槃

¹⁰⁸ 大正藏：滅

¹⁰⁹ 大正藏：滅

¹¹⁰ 大正藏：槃又言覆；永樂北藏及龍藏：又槃言覆

者名相，無相之義乃名涅槃。』善男子，槃者言有，無有之義乃名涅槃。槃名和合，無和合義乃名涅槃。槃者言苦，無苦之義乃名涅槃。

「善男子，斷煩惱者不名涅槃，不生煩惱乃名涅槃。

「善男子，諸佛如來煩惱不起，是名涅槃。所有智慧於法無礙是為如來，如來非是凡夫、聲聞、緣覺、菩薩，是名佛性。如來身、心、智慧遍滿無量無邊阿僧祇土，無所障閼，是名虛空。如來常住，無有變易，名曰實相。以是義故，如來實不畢竟涅槃。

「是名菩薩修大涅槃微妙經典具足成就第七功德。

「善男子，云何菩薩摩訶薩修大涅槃微妙經典具足成就第八功德？

「善男子，菩薩摩訶薩修大涅槃，除斷五事，遠離五事，成就六事，修習五事，守護一事，親近四事，信順一實，心善解脫，慧善解脫。

「善男子，云何菩薩除斷¹¹¹五事？所謂五陰：色、受、想、行、識。所言陰者，其義何謂？能

¹¹¹ 大正藏：斷除；永樂北藏及龍藏：除斷

令眾生生死相續，不離重擔¹¹²，分散聚合，三世所攝，求其實義了不可得。以是諸義故，名為陰。菩薩摩訶薩雖見色陰，不見其相。何以故？於十色中推求其性悉不可得，為世界故，說言為陰。受有百八，雖見受陰，初無受相。何以故？受雖百八，理無定實，是故菩薩不見受陰；想、行、識等亦復如是。菩薩摩訶薩深見五陰是生煩惱諸惡根本¹¹³。以是義故，方便令斷。

「云何菩薩遠離五事？所謂五見。何等為五？一者，身見；二者，邊見；三者，邪見；四者，戒取；五者，見取。因是五見生六十二見，因是諸見生死不絕，是故菩薩防護不近。

「云何菩薩成就六事？謂六念處。何等為六？一者，念佛；二者，念法；三者，念僧；四者，念天；五者，念施；六者，念戒。是名菩薩成就六事。

「云何菩薩修習五事？所謂五定：一者，知定；二者，寂定；三者，身心受快樂定；四者，無樂定；五者，首楞嚴定。修習如是五種定心，則得近於大般涅槃，是故菩薩勤心修習。

¹¹² 大正藏：擔

¹¹³ 大正藏：生煩惱之根本也；永樂北藏及龍藏：生煩惱諸惡根本

「云何菩薩守護一事？謂菩提心。菩薩摩訶薩常勤守護是菩提心，猶如世人守護一子，亦如瞎者護餘一目，如行曠野守護導者，菩薩守護菩提之心亦復如是。因護如是菩提心故，得阿耨多羅三藐三菩提；因得阿耨多羅三藐三菩提故，常、樂、我、淨具足而有，即是無上大般涅槃。是故，菩薩守護一法。

「云何菩薩親近四事？謂四無量心。何等為四？一者，大慈；二者，大悲；三者，大喜；四者，大捨。因是四心能令無量無邊眾生發菩提心，是故菩薩繫心親近。

「云何菩薩信順一實？菩薩了知一切眾生皆歸一道，一道者謂大乘也。諸佛、菩薩為眾生故分之為三，是故菩薩信順不逆。

「云何菩薩心善解脫？貪、恚、癡心永斷滅故，是故¹¹⁴菩薩心善解脫。

「云何菩薩慧善解脫？菩薩摩訶薩於一切法知無障閼，是名菩薩慧善解脫。因慧解脫，昔所不聞而今得聞，昔所不見而今得見，昔所不至¹¹⁵而今得至¹¹⁶。」

¹¹⁴ 大正藏：名

¹¹⁵ 大正藏：到

¹¹⁶ 大正藏：到

爾時，光明遍照高貴德王菩薩摩訶薩言：「世尊！如佛所說心解脫者，是義不然。何以故？心本無繫。所以者何？是心本性不為貪欲、瞋恚、愚癡、諸結所縛。若本無繫，云何而言心善解脫？世尊！若心本性不為貪結之所繫者，何等因緣而能得繫？如人搆¹¹⁷角，本無乳相，雖加功力，乳無由出。穀於乳者，則不如是，加功雖少，乳則多出。心亦如是，本無貪者，今云何有？若本無貪，後方有者，諸佛、菩薩本無貪相，今悉應有。

「世尊！譬如石女，本無子相，雖加功力，無量因緣，子不可得；心亦如是，本無貪相，雖造眾緣，貪無由生。世尊！如鑽濕木，火不可得；心亦如是，雖復鑽求，貪不可得。云何貪結能繫於心？

「世尊！譬如壓沙，油不可得；心亦如是，雖復壓之，貪不可得。當知貪、心二理各異，設復有之，何能污心？世尊！譬如有人安櫬於空，終不得住，安貪於心亦復如是，種種因緣不能令貪繫縛於心。

「世尊！若心無貪名解脫者，諸佛、菩薩何故不拔虛空中刺？世尊！過去世心不名解脫，未

¹¹⁷ 大正藏：穀

來世心亦無解脫，現在世心不與道共，何等世心名得解脫？

「世尊！如過去燈不能滅闇，未來世燈亦不滅闇，現在世燈復不滅闇。何以故？明之與闇二不並故。心亦如是，云何而言心得解脫？

「世尊！貪亦是有。若貪無者，見女相時不應生貪。若因女相而得生者，當知是貪真實而有。以有貪故，墮三惡道。

「世尊！譬如有人見畫女像亦復生貪，以生貪故得種種罪。若本無貪，云何見畫而生於貪？若心無貪，云何如來說言菩薩心得解脫？若心有貪，云何見相然後方生？不見相者則不生耶？我今現見有惡果報，當知有貪、瞋恚、愚癡亦復如是。

「世尊！譬如眾生有身無我，而諸凡夫橫計我想。雖有我想，不墮三趣。云何貪者於無女相而起女想，墮三惡道？

「世尊！譬如鑽火¹¹⁸而生於火，然是火性眾緣中無，以何因緣而得生耶？世尊！貪亦如是，色中無貪，香、味、觸、法亦復無貪。云何於色、香、味、觸、法而生貪耶？若眾緣中悉無貪者，

¹¹⁸ 大正藏：木

云何眾生獨生於貪，諸佛、菩薩而不生耶？

「世尊！心亦不定。若心定者，無有貪欲、瞋恚、愚癡；若不定者，云何而言心得解脫？貪亦不定，若不定者，云何因之生三惡趣？貪者、境界二俱不定。何以故？俱緣一色，或生於貪，或生於瞋，或生愚癡。是故，貪者及與境界二俱不定。若俱不定，何故如來說言：『菩薩修大涅槃，心得解脫。』」

爾時，世尊告光明遍照高貴德王菩薩摩訶薩言：「善哉！善哉！善男子，心亦不為貪結所繫、亦非不繫，非是解脫、非不解脫，非有非無，非現在、非過去、非未來。何以故？善男子，一切諸法無自性故。」

「善男子，有諸外道作如是言：『因緣和合則有果生。』若眾緣中本無生性而能生者，虛空不生亦應生果。虛空不生非是因故，以眾緣中本有果性，是故合集而得生果。所以者何？如提婆達欲造牆壁則取泥土，不取采¹¹⁹色；欲造畫像則集采¹²⁰色，不取草木；作衣取縷，不取泥木；作舍取泥，不取縷縲。以人取故，當知是中各能生

¹¹⁹ 大正藏：彩

¹²⁰ 大正藏：彩

果；以能生果故，當知因中必先有性。若無性者，一物之中應當出生一切諸物。若是可取、可作、可出，當知是中必先有果。若無果者，人則不取、不作、不出。唯有虛空無取無作故，能出生一切萬物。以有因故，如尼拘陀子住尼拘陀樹、乳有醍醐、縷中有布、泥中有瓶。

「善男子，一切凡夫無明所盲作是定說：『色有著義，心有貪性。』復言：『凡夫心有貪性，亦解脫性。遇貪因緣，心則生貪；若遇解脫，心則解脫。』雖作此說，是義不然。有諸凡夫復作是言：『一切因中悉無有果。』因有二種：一者，微細；二者，麤大。細則¹²¹是常，麤則無常。從微細因轉成麤因，從此麤因轉復成果。麤無常故，果亦無常。

「善男子，有諸凡夫復作是言：『心亦無因，貪亦無因，以時節故則生貪心。』如是等輩以不能知心因緣故，輪迴六趣，具受生死。

「善男子，譬如枷犬繫之於柱，終日繞柱不能得離。一切凡夫亦復如是，被無明枷繫生死柱，繞二十五有不能得離。

「善男子，譬如有人墮於園廁，既得出已而

¹²¹ 大正藏：即

復還入；如人病差，還為病因；如人涉路，值空曠處，既得過已，而復還來；又如淨洗還塗泥土；一切凡夫亦復如是，已得解脫無所有處，唯未得脫非非想處，而復還來至三惡趣。何以故？一切凡夫惟觀於果，不觀因緣。如犬逐塊，不逐於人。凡夫之人亦復如是，惟觀於果，不觀於因緣¹²²。以不觀故，從非想退還三惡趣。

「善男子，諸佛、菩薩終不定說因中有果、因中無果及有無果、非有非無果。若言因中先定有果及定無果、定有無果、定非有非無果，當知是等皆魔伴黨，繫屬於魔，即是愛人。如是愛人，不能永斷生死繫縛，不知心相及以貪相。

「善男子，諸佛菩薩顯示中道。何以故？雖說諸法，非有非無，而不決定。所以者何？因眼、因色、因明、因心、因念，識則得生。是識決定不在眼中、色中、明中、心中、念中，亦非中間，非有非無，從緣生故名之為有，無自性故名之為無。是故，如來說言諸法非有非無。

「善男子，諸佛、菩薩終不定說心有淨性及不淨性，淨、不淨心無住處故。從緣生貪，故說非無；本無貪性，故說非有。

¹²² 大正藏：不觀因緣；永樂北藏及龍藏：不觀於因緣

「善男子，從因緣故，心則生貪；從因緣故，心則解脫。善男子，因緣有二：一者，隨於生死；二者，隨大涅槃。

「善男子，有因緣故，心共貪生共貪俱滅，有共貪生不共貪滅，有不共貪生共貪俱滅，有不共貪生不共貪滅。

「云何心共貪生共貪俱滅？善男子，若有凡夫，未斷貪心修習貪心，如是之人心共貪生心共貪滅。一切眾生不斷貪心，心共貪生心共貪滅。如欲界眾生一切皆有初地味禪，若修不修，常得成就，遇因緣故即便得之，言因緣者，謂火災也。一切凡夫亦復如是，若修不修，心共貪生心共貪滅。何以故？不斷貪故。

「云何心共貪生不共貪滅？聲聞弟子有因緣故生於貪心，畏貪心故修白骨觀，是名心共貪生不共貪滅。復有心共貪生不共貪滅，如聲聞人未證四果，有因緣故生於貪心，證四果時貪心得滅，是名心共貪生不共貪滅。菩薩摩訶薩得不動地時，心共貪生不共貪滅。

「云何不共貪生共貪俱滅？若菩薩摩訶薩斷貪心已，為眾生故，示現有貪。以示現故，能令無量無邊眾生諮受善法，具足成就，是名不共

貪生共貪俱滅。

「云何不共貪生不共貪滅？謂阿羅漢、緣覺、諸佛、除不動地其餘菩薩，是名不共貪生不共貪滅。以是義故，諸佛菩薩不決定說心性本淨、性本不淨。

「善男子，是名¹²³不與貪結和合，亦復不與瞋、癡和合。善男子，譬如日月，雖為烟塵雲霧及羅睺羅¹²⁴之所覆蔽，以是因緣，令諸眾生不能得見。雖不可見，日月之性終不與彼五翳和合。心亦如是，以因緣故生於貪結。眾生雖說心與貪合，而是心性實不與合。若是貪心即是貪性，若是不貪即不貪性，不貪之心不能為貪，貪結之心不能不貪。善男子，以是義故，貪欲之結不能污心。

「諸佛、菩薩永破貪結，是故說言心得解脫。一切眾生從因緣故，生於貪結；從因緣故，心得解脫。

「善男子，譬如雪山懸峻之處，人與獼猴俱不能行；或復有處，獼猴能行，人不能行；或復有處，人與獼猴二俱能行。善男子，人與獼猴能

¹²³ 大正藏：心

¹²⁴ 大正藏：阿修羅；永樂北藏及龍藏：羅睺羅

行處者，如諸獵師，純以獼膠置之案上，用捕獼猴。獼猴癡故，往手觸之，觸已黏¹²⁵手；欲脫手故，以脚蹋之，脚復隨著；欲脫脚故，以口齧之，口復黏著。如是五處悉無得脫。於是獵師以杖貫之，負還歸家。雪山嶮處，譬佛菩薩所得正道；獼猴者，譬諸凡夫；獵師者，譬¹²⁶魔波旬；獼膠者，譬貪欲結。人與獼猴俱不能¹²⁷行者，譬諸凡夫、魔王波旬俱不能行。獼猴能行人不能¹²⁸者，譬諸外道有智慧者，諸惡魔等雖以五欲不能繫縛；人與獼猴俱能行者，一切凡夫及魔波旬常處生死，不能修行。凡夫之人五欲所縛，令魔波旬自在將去，如彼獵師獼捕獼猴，負之歸家。

「善男子，譬如國王安住己界，身心安樂，若至他界則得眾苦。一切眾生亦復如是，若能自住於己境界則得安樂；若至他界則遇惡魔，受諸苦惱。自境界者，謂四念處；他境界者，謂五欲也。

「云何名為繫屬於魔？有諸眾生，無常見常，常見無常；苦見於樂，樂見於苦；不淨見淨，淨見不淨；無我見我，我見無我；非實解脫妄見解

¹²⁵ 大正藏：粘

¹²⁶ 大正藏：喻

¹²⁷ 大正藏：不；永樂北藏及龍藏：不能

¹²⁸ 大正藏：不能行；永樂北藏及龍藏：不能

脫，真實解脫見非解脫；非乘見乘，乘見非乘。如是之人，名繫屬魔。繫屬魔者，心不清淨。

「復次，善男子，若見諸法真實是有總別定相者¹²⁹，當知是人若見色時便作色相，乃至見識亦作識相，見男男相，見女女相，見日日相，見月月相，見歲歲相，見陰陰相，見入入相，見界界相。如是見者，名繫屬魔。繫屬魔者，心不清淨。

「復次，善男子，若見我是色、色中有我、我中有色、色屬於我，乃至見我是識、識中有我、我中有識、識屬於我，如是見者，繫屬於魔，非我弟子。

「善男子，我聲聞弟子遠離如來十二部經，修習外道種種¹³⁰典籍，不修出家寂滅之業，純營世俗在家之事。何等名為在家之事？受畜一切不淨之物，奴婢、田宅、象馬車乘、驢、騾¹³¹、雞、犬、獼猴、猪、羊、種種穀麥，遠離師僧，親附白衣，違反聖教，向諸白衣作如是言：『佛聽比丘受畜種種不淨之物。』是名修習在家之事。

「有諸弟子不為涅槃，但為利養，親近聽受

¹²⁹ 大正藏：相；永樂北藏及龍藏：相者

¹³⁰ 大正藏：種種外道；永樂北藏及龍藏：外道種種

¹³¹ 大正藏：駝、驢；永樂北藏及龍藏：驢、騾

十二部經，招提僧物及僧鬘物，衣著貪¹³²啖如自己，慳惜他家，及以稱譽親近國王及諸王子，卜筮吉凶，推步盈虛，圍碁六博，擲菹投壺，親比丘尼及諸處女，畜二沙彌，常遊屠獵、沽¹³³酒之家及旃陀羅所住之處，種種販賣，手自作食，受使鄰國通致信命。如是之人，當知即是魔之眷屬，非我弟子。以是因緣，心共貪生心共貪滅，乃至癡心共生共滅亦復如是。

「善男子，以是因緣，心性非¹³⁴淨，亦非不淨。是故，我說心得解脫。

「若有不受不畜一切不淨之物，為大涅槃受持讀誦十二部經，書寫解說，當知是等真我弟子，不行惡魔波旬境界，即是修習三十七品。以修習故，不共貪生不共貪滅。是名菩薩修大涅槃微妙經典具足成就第八功德。

大般涅槃經卷第二十三

¹³² 大正藏：食；永樂北藏及龍藏：貪

¹³³ 大正藏：酤

¹³⁴ 大正藏：不

大般涅槃經卷第二十四

北涼天竺三藏曇無讖譯 梵

宋沙門慧嚴慧觀同謝靈運再治

高貴德王菩薩品第二十二之六¹³⁵

「復次，善男子，云何菩薩摩訶薩修大涅槃微妙經典具足成就第九功德？

「善男子，菩薩摩訶薩修大涅槃微妙經典，初發五事悉得成就。何等為五？一者，信；二者，直心；三者，戒；四者，親近善友；五者，多聞。

「云何為信？菩薩摩訶薩信於三寶，施有果報；信於二諦一乘之道，更無異趣，為諸眾生速得解脫，諸佛菩薩分別為三；信第一義諦；信善方便。是名為信。如是信者，若諸沙門，若婆羅門，若天、魔、梵，一切眾生所不能壞。因是信故，得聖人性。修行布施若多若少，悉得近於大般涅槃，不墮生死；戒、聞、智慧亦復如是。是名為信。雖有是信而亦不見，是為菩薩修大涅槃成就初事。

「云何直心？菩薩摩訶薩於諸眾生作質直

¹³⁵ 大正藏：光明遍照高貴德王菩薩品之六

心。一切眾生若遇因緣則生諂曲，菩薩不爾。何以故？善解諸法悉因緣故。菩薩摩訶薩雖見眾生諸惡過咎，終不說之。何以故？恐生煩惱，若生煩惱則墮惡趣。如是菩薩若見眾生有少善事，則讚歎之。云何為善？所謂佛性。讚佛性故，令諸眾生發阿耨多羅三藐三菩提心。」

爾時，光明遍照高貴德王菩薩摩訶薩白佛言：「世尊！如佛所說：『菩薩摩訶薩讚歎佛性，令無量眾生發阿耨多羅三藐三菩提心。』是義不然。何以故？如來初開涅槃經時，說有三種：一者，若有病人得良醫藥及瞻病者，病則易差，如其不得則不可愈；二者，若得、不得，悉不可差；三者，若得、不得，悉皆自¹³⁶差。一切眾生亦復如是，若遇善友、諸佛菩薩聞說妙法，能發阿耨多羅三藐三菩提心，如其不遇則不能發，所謂須陀洹、斯陀含、阿那含、阿羅漢、辟支佛。二者，雖遇善友、諸佛菩薩聞說妙法，亦不能發，若其不遇亦不能發，謂一闡提。三者，若遇、不遇，一切悉能發阿耨多羅三藐三菩提心，所謂菩薩。若言遇與不遇悉發阿耨多羅三藐三菩提心者，如來今者云何說言，因讚佛性令諸眾生發阿耨多羅

¹³⁶ 大正藏：可

三藐三菩提心？

「世尊！若遇善友、諸佛菩薩聞說妙法及以不遇，悉不能發阿耨多羅三藐三菩提心，當知是義亦復不然。何以故？如是之人當得阿耨多羅三藐三菩提故。一闍提輩以佛性故，若聞、不聞，悉亦當得阿耨多羅三藐三菩提故。

「世尊！如佛所說，何等名為一闍提¹³⁷？謂斷善根。如是之義亦復不然。何以故？不斷佛性故。如是佛性理不可斷，云何佛說斷諸善根？如佛往昔說十二部經，善有二種：一者，常；二者，無常。常者不斷，無常者斷。無常可斷，故墮地獄；常不可斷，何故不遮？佛性不斷非一闍提，如來何故作如是說言一闍提？世尊！若因佛性發阿耨多羅三藐三菩提¹³⁸，何故如來廣為眾生說十二部經？

「世尊！譬如四河出阿耨達池，若有天、人、諸佛世尊說言：『是河不入大海，當還本源。』無有是處。菩提之心亦復如是。有佛性者，若聞、不聞，若戒、非戒，若施、非施，若修、不修，若智、非智，悉皆應得阿耨多羅三藐三菩提。

¹³⁷ 大正藏：一闍提耶；永樂北藏及龍藏：一闍提

¹³⁸ 大正藏：菩提心；永樂北藏及龍藏：菩提

「世尊！如優陀延山，日從中出至于正南。日若念言『我不至西，還東方』者，無有是處。佛性亦爾，若不聞、不戒、不施、不修、不智、不得阿耨多羅三藐三菩提者，無有是處。」

「世尊！諸佛如來說因果性非有非無，如是之義是亦不然。何以故？如其乳中無酪性者，則無有酪；尼拘陀子無五丈性者¹³⁹，則不能生五丈之質。若佛性中無阿耨多羅三藐三菩提樹者，云何能生阿耨多羅三藐三菩提樹？以是義故，所說因果非有非無，如是之義云何相應？」

爾時，世尊讚言：「善哉，善哉。善男子，世有二人甚為希有，如優曇華：一者，不行惡法；二者，有罪能悔。如是之人，甚為希有。復有二人：一者，作恩；二者，念恩。復有二人：一者，咨受新法；二者，溫故不忘。復有二人：一者，造新；二者，修故。復有二人：一，樂聞法；二，樂說法。復有二人：一，善問難；二，善能答。善問難者，汝身是也；善能答者，謂如來也。善男子，因是善問即得轉于無上法輪，能枯十二因緣大樹，能度無邊生死大海¹⁴⁰，能與魔王波旬共

¹³⁹ 大正藏：者；永樂北藏及龍藏：性者

¹⁴⁰ 大正藏：河

戰，能摧波旬所立勝幢。

「善男子，如我上¹⁴¹說：『三種病人，值遇良醫、瞻病、好藥及以不遇，病悉得差。』是義云何？若得、不得，謂定壽命。所以者何？是人已於無量世中修三種善，謂上、中、下，以修如是三種善故，得定壽命。如鬱單越人壽命千年。有遇病者，若得良醫、好藥、瞻病及以不得，悉皆得差。何以故？得定命故。」

「善男子，如我所說：『若有病人，得遇良醫、好藥、瞻病，病得除差；若不遇者，則不得差。』是義云何？善男子，如是之人壽命不定，命雖不盡，有九因緣能夭其壽。何等為九？一者，知食不安而反食之；二者，多食；三者，宿食未消而復更食；四者，大小便利不隨時節；五者，病時不隨醫教；六者，不隨瞻病教勅；七者，強耐不吐；八者，夜行，以夜行故，惡鬼打之；九者，房室過差。以是緣故，我說：『病者若遇醫藥病則可差，若不遇者則不可愈。』」

「善男子，如我上¹⁴²說『若遇、不遇，俱不差』者，是義云何？有人命盡，若遇、不遇，悉

¹⁴¹ 大正藏：先

¹⁴² 大正藏：先

不可差。何以故？以命盡故。以是義故，我說：『病人若遇醫藥及以不遇，悉不得差。』

「眾生亦爾，發菩提心者，若遇善友、諸佛菩薩咨受深法，若不遇之，皆悉當成。何以故？以其能發菩提心故，如鬱單越人得定壽命。

「如我所說：『從須陀洹至辟支佛，若聞善友、諸佛菩薩所說深法，則發阿耨多羅三藐三菩提心；若不值遇諸佛菩薩聞說深法，則不能發阿耨多羅三藐三菩提¹⁴³。』如不定命，以九因緣，命則中夭。如彼病人，值遇醫藥，病則得差；若不遇者，病則不差。是故，我說遇佛菩薩聞說深法則能發心；若不值遇，則不能發。

「如我上¹⁴⁴說：『若遇善友、諸佛菩薩聞說深法，若不值遇，俱不能發。』是義云何？善男子，一闍提輩，若遇善友、諸佛菩薩聞說深法及以不遇，俱不得離一闍提心。何以故？斷善法故。一闍提輩亦得阿耨多羅三藐三菩提，所以者何？若能發於菩提之心則不復名一闍提也。

「善男子，以何緣故說一闍提得阿耨多羅三藐三菩提？一闍提輩實不得¹⁴⁵阿耨多羅三藐三

¹⁴³ 大正藏：菩提心；永樂北藏及龍藏：菩提

¹⁴⁴ 大正藏：先

¹⁴⁵ 大正藏：不能得；永樂北藏及龍藏：不得

菩提，如命盡者，雖遇良醫、好藥、瞻病，不能得差。何以故？以命盡故。

「善男子，一闡，名信；提，名不具。信不具故¹⁴⁶，名一闡提。佛性非信，眾生非具，以不具故，云何可斷？一闡，名善方便；提，名不具。修善方便不具足故，名一闡提。佛性非是修善方便，眾生非具，以不具故，云何可斷？一闡，名進；提，名不具。進不具故，名一闡提。佛性非進，眾生非具，以不具故，云何可斷？一闡，名念；提，名不具。念不具故，名一闡提。佛性非念，眾生非具，以不具故，云何可斷？一闡，名定；提，名不具。定不具故，名一闡提。佛性非定，眾生非具，以不具故，云何可斷？一闡，名慧；提，名不具。慧不具故，名一闡提。佛性非慧，眾生非具，以不具故，云何可斷？一闡，名無常善；提，名不具。以無常善不具足故，名一闡提。佛性是常¹⁴⁷，非善非不善。何以故？善法要從方便而得，而是佛性非方便得，是故非善。何故復名非不善耶？能得善果故，善果即是阿耨多羅三藐三菩提。又，善法者生已得故，而是佛

¹⁴⁶ 大正藏：不具信故；永樂北藏及龍藏：信不具故

¹⁴⁷ 大正藏：佛性非無常；永樂北藏及龍藏：佛性是常

性非生已得，是故非善。以斷生得諸善法故，名一闡提。

「善男子，如汝所言：『若一闡提有佛性者，云何不遮地獄之罪？』善男子，一闡提中無有佛性。善男子，譬如有王聞箜篌音，其聲清妙，心即耽著，喜樂愛念，情無捨離。即告大臣：『如是妙音從何處出？』大臣答王¹⁴⁸：『如是妙音從箜篌出。』王復語言：『持是聲來。』爾時，大臣即持箜篌置於王前，而作是言：『大王當知，此即是聲。』王語箜篌：『出聲！出聲！』而是箜篌聲亦不出。爾時，大王即斷其絃，聲亦不出；取其皮木，悉皆析裂，推求其聲，了不能得。爾時，大王即瞋大臣：『云何乃作如是妄語？』大臣白王：『夫取聲者，法不如是。應以眾緣善巧方便，聲乃出耳。』眾生佛性亦復如是，無有住處，以善方便故得可見；以可見故，得阿耨多羅三藐三菩提。一闡提輩不見佛性，云何能遮三惡道罪？善男子，若一闡提信有佛性，當知是人不至三趣，是亦不名一闡提也。以不自信有佛性故，即墮三趣；墮三趣故，名一闡提。

「善男子，如汝所說：『若乳無酪性，不應

¹⁴⁸ 大正藏：言

出酪；尼拘陀子無五丈性，則不應有五丈之質。』愚癡之人作如是說，智者終不發如是言。何以故？以無性故。善男子，如其乳中有酪性者，不應復假眾緣力也。善男子，如水乳雜，卧至一月，終不成酪。若以一滲頗求樹汁，投之於中即便成酪。若本有酪，何故待緣？眾生佛性亦復如是，假眾緣故則便可見，假眾緣故得成阿耨多羅三藐三菩提。若待眾緣然後成者，即是無性；以無性故，能得阿耨多羅三藐三菩提。善男子，以是義故，菩薩摩訶薩常讚人善，不訟彼缺，名質直心。

「復次，善男子，云何菩薩質直心耶？菩薩摩訶薩常不犯惡，設有過失即時懺悔，於師、同學終不覆藏，慚愧自責，不敢復作，於輕罪中生極重想。若人詰問，答言：『實犯。』復問：『是罪為好？不好？』答言：『不好。』復問：『是罪為善？不善？』答言：『不善。』復問：『是罪是善果耶？不善果乎¹⁴⁹？』答言：『是罪實非善果。』又問：『是罪誰之所造？將非諸佛、法、僧所作？』答言：『非佛、法、僧，我所作也，乃是煩惱之所構¹⁵⁰集。』以直心故，信有佛性；信佛性故，

¹⁴⁹ 大正藏：耶

¹⁵⁰ 大正藏：構

則不得名一闡提也。以直心故，名佛弟子，若受眾生衣服、飲食、卧具、醫藥，種各十¹⁵¹萬，不足為多。是名菩薩質直心也。

「云何菩薩修治於戒？菩薩摩訶薩受持禁戒，不為生天，不為恐怖，乃至不受狗戒、雞戒、牛戒、雉戒，不作破戒，不作缺戒，不作瑕戒，不作雜戒，不作聲聞戒，受持菩薩摩訶薩戒、尸羅波羅蜜戒，得具足戒不生憍慢，是名菩薩修大涅槃具第三戒。

「云何菩薩親近善友？菩薩摩訶薩常為眾生歎說¹⁵²善道，不說惡道，說於惡道非善果報。善男子，我身即是一切眾生真善知識，是故能斷富伽羅婆羅門所有邪見。善男子，若有眾生親近我者，雖有應生地獄因緣即得生天。如須那剎多等應墮地獄，以見我故，即得斷除地獄因緣，生於色天。雖有舍利弗、目犍¹⁵³連等，不名眾生真善知識。何以故？生一闡提心因緣故。善男子，我昔住於波羅捺國時，舍利弗教二弟子：一觀白骨，一令數息，經歷多年，皆不得定。以是因緣，即生邪見，言：『無涅槃無漏之法。若其有者，

¹⁵¹ 大正藏：千

¹⁵² 大正藏：說於；永樂北藏及龍藏：歎說

¹⁵³ 大正藏：犍

我應得之。何以故？我能善持所受戒故。』我於爾時見是比丘生此邪心，喚舍利弗而呵責¹⁵⁴之：『汝不善教，云何乃為是二弟子顛倒說法？汝二弟子其性各異：一主澣¹⁵⁵衣，一是金師。金師之子應教數息，澣¹⁵⁶衣之人應教骨觀。以汝錯教，令是二人生於惡邪。』我於爾時，為是二人如應說法，二人聞已，得阿羅漢果。是故，我為一切眾生真善知識，非舍利弗、目犍¹⁵⁷連等。若使眾生有極重結得遇我者，我以方便即為斷之。如我弟難陀有極重欲，我以種種善巧方便而為除之¹⁵⁸；鴛掘魔羅有重瞋恚，以見我故，瞋恚即斷；阿闍世王有重愚癡，以見我故，癡心即滅；如婆熙伽長者，於無量劫積集成就極重煩惱，以見我故，即便斷滅。設有弊惡廝下之人，親近於我作弟子者，以是因緣，一切人天恭敬愛念。尸利毘多邪見熾盛，因見我故，邪見即滅。因見我故，斷地獄因，作生天緣，如氣噓旃陀羅。命垂終時，因見我故，還得壽命，如憍尸迦。狂心錯亂，因見我故，還得本心，如瘦瞿曇彌。屠家之子，常作

¹⁵⁴ 大正藏：噴

¹⁵⁵ 大正藏：浣

¹⁵⁶ 大正藏：浣

¹⁵⁷ 大正藏：犍

¹⁵⁸ 大正藏：斷

惡業，以見我故，即便捨離，如闍提比丘。因見我故，寧捨身命，不毀禁戒，如草繫比丘。以是義故，阿難比丘說：『半梵行名善知識。』我言：『不爾，具足梵行乃名善知識。』是名菩薩修大涅槃具足第四親善知識。

「云何菩薩摩訶薩¹⁵⁹具足多聞？菩薩¹⁶⁰為大涅槃，十二部經書寫讀誦，分別解說，是名菩薩具足多聞。除十一部經¹⁶¹，惟¹⁶²毗佛略，受持讀誦，書寫解說，亦名菩薩具足多聞。除十二部經，若能受持是大涅槃微妙經典，書寫讀誦，分別解說，是名菩薩具足多聞。除是經典，具足全體，若能受持一四句偈；復除是偈，若能受持如來常住性無變易，是名菩薩具足多聞。復除是事，若知如來常不說法，亦名菩薩具足多聞。何以故？法無性故。如來雖說一切諸法，常無所說，是名菩薩修大涅槃成就第五具足多聞。

「善男子，若有善男子、善女人，為大涅槃具足成就如是五事，難作能作，難忍能忍，難施能施。云何菩薩難作能作？若聞有人食一胡麻得阿耨多羅三藐三菩提者，信是語故，乃至無量阿

¹⁵⁹ 大正藏：菩薩：永樂北藏及龍藏：菩薩摩訶薩

¹⁶⁰ 大正藏：菩薩摩訶薩：永樂北藏及龍藏：菩薩

¹⁶¹ 大正藏：十一部：永樂北藏及龍藏：十一部經

¹⁶² 大正藏：唯

僧祇劫常食一麻；若聞入火得阿耨多羅三藐三菩提者，於無量劫在阿鼻獄入熾火聚，是名菩薩難作能作。云何菩薩難忍能忍？若聞受苦手杖、刀、石斫打因緣得大涅槃，即於無量阿僧祇劫，身具受之，不以為苦，是名菩薩難忍能忍。云何菩薩難施能施？若聞能以國城、妻子、頭目、髓腦惠施於人得阿耨多羅三藐三菩提者，即於無量阿僧祇劫，以其所有國城、妻子、頭目、髓腦惠施於人，是名菩薩難施能施。菩薩雖復難作能作，終不念言：『是我所作。』難忍難施¹⁶³亦復如是。善男子，譬如父母唯有一子，愛之甚重，以好衣裳、上妙甘饈，隨時將養，令無所乏。設令其子於父母所起輕慢心，惡口罵辱，父母愛故，不生瞋恨，亦不念言：『我與是兒衣服、飲食。』菩薩摩訶薩亦復如是，視諸眾生猶如一子，若子遇病，父母亦病，為求醫藥，勤加救療，病既差已，終不念言：『我為是兒療治病苦。』菩薩亦爾，見諸眾生遇煩惱病，生愛念心而為說法，以聞法故，諸煩惱斷，煩惱斷已，終不念言：『我為眾生斷諸煩惱。』若生此念，終不得成阿耨多羅三藐三菩提。唯作是念：『無一眾生我為說法令斷煩惱。』菩薩

¹⁶³ 大正藏：難施能施：永樂北藏及龍藏：難忍難施

摩訶薩於諸眾生不瞋不喜。何以故？善能修習空三昧故。菩薩若修空三昧者，當於誰所生瞋生喜？善男子，譬如山林，猛火所焚，若人斫伐，或為水漂，而是林木當於誰所生瞋生喜？菩薩摩訶薩亦復如是，於諸眾生無瞋無喜。何以故？修空三昧故。」

爾時，光明遍照高貴德王菩薩¹⁶⁴白佛言：「世尊！一切諸法性自空耶？空空故空。若性自空者，不應修空，然後見空。云何如來言以修空而見空耶？若性自不空，雖復修空，不能令空。」

「善男子，一切諸法性本自空。何以故？一切法性不可得故。善男子，色性不可得。云何色性？色者¹⁶⁵，非地、水、火、風，不離地、水、火、風；非青、黃、赤、白，不離青、黃、赤、白；非有非無。云何當言色有自性？以性不可得故，說為空。一切諸法亦復如是，以相似相續故，凡夫見已，說言：『諸法性不空寂。』菩薩摩訶薩具足五事，是故見法性本空寂。善男子，若有沙門及婆羅門見一切法性不空者，當知是人非是沙門、非婆羅門，不得修習般若波羅蜜，不得入於

¹⁶⁴ 大正藏：菩薩摩訶薩；永樂北藏及龍藏：菩薩

¹⁶⁵ 大正藏：色性者；永樂北藏及龍藏：色者

大般涅槃，不得現見諸佛菩薩，是魔眷屬。

「善男子，一切諸法性本自空，亦因菩薩修習空故，見諸法空。善男子，如一切法性無常故，滅能滅之；若非無常，滅不能滅。有為之法有生相故，生能生之；有滅相故，滅能滅之。一切諸法有苦相故，苦能令苦。善男子，如鹽性鹹¹⁶⁶，能鹹¹⁶⁷異物；石蜜性甘，能甘異物；苦酒性醋¹⁶⁸，能醋¹⁶⁹異物；薑本性辛，能辛異物；呵梨勒苦，能苦異物；菴羅果淡，能淡異物；毒性能害，令異物害；甘露之性令人不死，若合異物亦能不死。菩薩修空亦復如是，以修空故，見一切法性皆空寂。」

光明遍照高貴德王菩薩復作是言：「世尊！若鹽能令非鹹作鹹，修空三昧若如是者，當知是定非善非妙，其性顛倒。若空三昧唯見空者，空是無法，為何所見？」

「善男子，是空三昧見不空法能令空寂，然非顛倒。如鹽，非鹹作鹹；是空三昧亦復如是，不空作空。善男子，貪是有性，非是空性。貪若是空，眾生不應以是因緣墮於地獄。若墮地獄，

¹⁶⁶ 大正藏：鹹

¹⁶⁷ 大正藏：鹹

¹⁶⁸ 大正藏：酢

¹⁶⁹ 大正藏：酢

云何貪性當是空耶？善男子，色性是有。何等是¹⁷⁰性？所謂顛倒，以顛倒故，眾生貪。若是色性非顛倒者，云何能令眾生貪？以生貪故，當知色性非不是有。以是義故，修空三昧非顛倒也。

「善男子，一切凡夫，若見女人即生女相；菩薩不爾，雖見女人，不生女相；以不生相，貪則不生；貪不生故，非顛倒也。以世間人見有女故，菩薩隨說言有女人。若見男時，說言是女，則是顛倒。是故，我為闍提說言：『汝婆羅門，若以晝為夜，是即顛倒；以夜為晝，是亦顛倒。』晝為晝相，夜為夜相¹⁷¹，云何顛倒？善男子，一切菩薩住九地者見法有性，以是見故，不見佛性。若見佛性，則不復見一切法性。以修如是空三昧故，不見法性；以不見故，則見佛性。諸佛菩薩有二種說：一者，有性；二者，無性。為眾生故，說有法性；為諸賢聖，說無法性。為不空者見法空故，修空三昧令得見空；無法性者，亦修空故空。以是義故，修空見空。

「善男子，汝言『見空，空是無法，為何所見¹⁷²？』者，善男子，如是！如是！菩薩摩訶薩

¹⁷⁰ 大正藏：色

¹⁷¹ 大正藏：相；永樂北藏：相；龍藏：根

¹⁷² 大正藏：見；永樂北藏及龍藏：所見

實無所見。無所見者，即無所有；無所有者，即一切法。菩薩摩訶薩修大涅槃，於一切法悉無所見。若有見者，不見佛性，不能修習般若波羅蜜，不得入於大般涅槃。是故，菩薩見一切法性無所有。善男子，菩薩不但因見三昧而見空也，般若波羅蜜亦空、禪波羅蜜亦空、毗梨耶波羅蜜亦空、羸提波羅蜜亦空、尸波羅蜜亦空、檀波羅蜜亦空，色亦空、眼亦空、識亦空、如來亦空、大般涅槃亦空。是故，菩薩見一切法皆悉是空。是故，我在迦毗羅城告阿難言：『汝莫愁惱、悲號¹⁷³、啼哭。』阿難即言：『如來世尊！我今親屬悉皆殄滅，云何當得不悲泣耶？如來與我俱生此城，俱同釋種親戚眷屬，云何如來獨不愁惱，光顏更顯？』善男子，我復告言：『阿難，汝見迦毗羅城真實是有，我見空寂，悉無所有。汝見釋種悉是親戚，我修空故，悉無所見。以是因緣，汝生愁苦，我身容顏益更光顯。』諸佛菩薩修習如是空三昧故，不生愁惱。是名菩薩修大涅槃微妙經典成就具足第九功德。

「復次，善男子¹⁷⁴，云何菩薩修大涅槃微妙

¹⁷³ 大正藏：泣

¹⁷⁴ 大正藏：善男子；永樂北藏及龍藏：復次，善男子

經典具足最後第十功德？善男子，菩薩修習三十七品，入大涅槃常、樂、我、淨，為諸眾生分別解說大涅槃經，顯示佛性。若須陀洹、斯陀含、阿那含、阿羅漢、辟支佛、菩薩信是語者，悉得入於大般涅槃；若不信者，輪迴生死。」

爾時，光明遍照高貴德王菩薩白佛言：「世尊！何等眾生於是經中不生恭敬？」

「善男子，我涅槃後，有聲聞弟子愚癡破戒，喜生鬪爭，捨十二部經，讀誦種種外道典籍、文頌手筆，受畜一切不淨之物，言是佛聽。如是之人，以好栴檀貿易凡木，以金易鍤石、銀易白鑞、絹易氈毼¹⁷⁵、以甘露味易於惡毒。云何栴檀貿易凡木？如我弟子，為供養故，向諸白衣演說經法，白衣情逸，不喜聽聞，白衣處高，比丘在下，兼以種種餽饌飲食而供給之，猶不肯聽，是名栴檀貿易凡木。云何以金貿易鍤石？鍤石譬色、聲、香、味、觸，金以譬戒。我諸弟子以色因緣破所受戒，是名以金貿易鍤石。云何以銀易於白鑞？銀譬十善，鑞譬十惡。我諸弟子放捨十善，行十惡法，是名以銀貿易白鑞。云何以絹貿易氈毼？氈毼以譬無慚無愧，絹譬慚愧。我諸弟子放捨慚

¹⁷⁵ 大正藏：褐（後同）

愧，習無慚愧，是名以絹貿易麩毳。云何甘露貿易毒藥？毒藥以譬種種供¹⁷⁶養，甘露以譬諸無漏法。我諸弟子為利養故，向諸白衣苦自譽讚¹⁷⁷，言得無漏，是名甘露貿易毒藥。以如是等惡比丘故，是大涅槃微妙經典廣行流布於閻浮提，當是之時，有諸弟子受持讀誦、書寫是經、演¹⁷⁸說流布，當為如是諸惡比丘之所殺害。時¹⁷⁹惡比丘，相與聚會，共立嚴制：『若有受持大涅槃經，書寫讀誦，分別說者，一切不得共住、共坐、談論語言。何以故？涅槃經者，非佛所說，邪見所造。邪見之人即是六師，六師所說非佛經典。所以者何？一切諸佛悉說諸法無常、無我、無樂、無淨，若言諸法常、樂、我、淨，云何當是佛所說經？諸佛菩薩聽諸比丘畜種種物，六師所說不聽弟子畜一切物，如是之義云何當是佛之所說？諸佛菩薩不制弟子斷牛五味及以食肉，六師不聽食五種鹽、五種牛味及以脂血，若斷是者，云何當是佛之正典？諸佛菩薩演說三乘，而是經中純說一乘謂大涅槃，如此之言云何當是佛之正典？諸佛畢竟入於涅槃，是經言佛常、樂、我、淨，不入涅槃

¹⁷⁶ 大正藏：利

¹⁷⁷ 大正藏：若自舉讚：永樂北藏及龍藏：苦自譽讚

¹⁷⁸ 大正藏：廣

¹⁷⁹ 大正藏：是

槃，是經不在十二部數，即是魔說，非是佛說。』

「善男子，如是之人雖我弟子，不能信順是涅槃經。善男子，當爾之時，若有眾生信此經典乃至半句，當知是人真我弟子。因如是信，即見佛性，入於涅槃。」

爾時，光明遍照高貴德王菩薩白佛言：「世尊！善哉！善哉！如來今日善能開示大涅槃經。世尊！我因是事即得悟解大涅槃經一句、半句，以解一句至半句故少見¹⁸⁰佛性。如佛所說，我亦當得入大涅槃。」

「是名菩薩修大涅槃微妙經典具足成就第十功德。」

大般涅槃經卷第二十四

¹⁸⁰ 大正藏：見少；永樂北藏及龍藏：少見

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無大般涅槃經 (合掌三稱)

發願文

(一編)

志心懺悔。我(某甲)與一切衆生，從無始來，
迷失真心，流轉生死，六根罪障，無量無邊，圓
妙佛乘，無以開解，一切所願，不得現前。我今
讀誦大般涅槃經，以此善根，發露黑惡，過、現、
未來三業所造無邊重罪，皆得消滅，身心清淨，

惑障蠲除，福智莊嚴，淨因增長，自他行願速得圓成。願諸如來常在說法，所有功德起隨喜心，迴向菩提，證常樂果。命終之日，正念現前，面見彌陀及諸聖衆，一剎那頃，生蓮華中。普願衆生，俱成佛道。

迴向偈

(一編)

誦經功德殊勝行 無邊勝福皆迴向
普願沉溺諸有情 速往無量光佛刹
十方三世一切佛 一切菩薩摩訶薩
摩訶般若波羅蜜

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

